

文
定
集
四



集 定 文

(四)

撰 辰 應 汪

戚

中華民國二十四年十二月初版

撰者 汪應辰

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

王雲五主編
叢書集成初編

文定集
四冊

(本書校對者 宗大樸 楊伯屏 張叔介)

文定集卷十九

啓

答沈總領

服在邇僚。蔑聞于報效。畀之輔郡。仍假于寵名。引退而蒙優異之恩。負疴而當浩穰之寄。皆難稱塞。方切戰兢。載瞻使華。實總邦計。庶幾託庇。得以蒙休。方欲修詞。遽勤惠問。仰謙光之過厚。愧遲鈍之後時。恭惟某官。學造高明。器涵剛實。存心惻怛。期康濟于斯時。持論正平。獨力行于是道。踐揚滋久。聞望日新。豈徒蕭何給餽之功。尤得劉晏養民之意。進膺大任。益究遠猷。念造謁以無從。徒依仁之是幸。其爲向往。罔旣敷陳。

答提宮楊朝議

簡書之畏。莫遂于披承。竿牘之勤。亦稽于修布。曾謂眷存之厚。特貽問訊之先。恭惟某官。才猷淵宏。器尙冲雅。周旋四郡。率多善政之聲。偃息一廬。甫遂高年之樂。已釋簪裳之累。尙垂桑梓之恭。豈云見私。足以觀德。更冀珍育。益保壽臧。

答查運使

沂洞萬里。跋涉三時。蓋艱險之備嘗。殆形神之不屬。息肩弛擔。雖疲茶之少瘳。問俗觀風。繄撫綏之未易。

敢謂眷存之厚。特貽問訊之勤。無以克承。第知愧荷。恭惟運使直閣。學問純正。識造精微。化未澄清。暫倚登車之重。事雖肯綮。豈勞游刃之餘。已藹著于休聲。卽進膺于大任。顧惟疎拙。竊幸依憑。蒙霧而行。自獲不言之潤。同舟以濟。庶收必至之功。

又

向賴均茵之舊。方紆攬轡之嚴。庶幾蒙成。其或免戾。未遑修問。先辱賜書。情文並隆。感愧參集。恭惟運使直閣。躬受異稟。學承正傳。傑然館閣之中。藉甚搢紳之譽。納約自牖。進盡忠嘉之言。舍車而徒。退安閒燕之地。屬元臣之開府。啓婉畫以濟時。宜遂贊于廟謨。乃出持于漕節。矧遠氓之凋敝。復遠候之釋騷。方臨盤錯之交。尤藉調劑之妙。豈惟疎拙。得所依憑。念請謁之可期。冀與居之益護。

又

伏審乘傳一封。肅將漕節。先庚三日。亟布教條。入境之初。望風胥慶。恭惟運使直閣。學傳正統。躬蹈聖言。探索逢原。蓋顯微之無間。從容應務。固左右以具宜。雖使指之游更。實蜀人之蒙幸。顧惟疎拙。復獲依承。聞親戚警效之音。孰云遠宦。從仁義燕閒之樂。復如昔時。方欲修辭。遽勤惠問。其爲欣荷。罔旣敷陳。

答祝運使

伏審祇奉郵傳。進持漕節。不待贊書之下。式遄攬轡之行。蓋宿師十萬之嚴。日需供億。而發軔再三之後。民久罷勞。顧方急于得人。豈復拘于常法。恭惟某官。才猷瞻博。德度粹和。踐揚屢著于賢勞。出入益推于

久次仕隨所遇。忘蜀道之登天。政底于成。俾蠻方之按堵。惟茲委寄。亦已褒優。應辰自視拙疎。實叨雅素。乃幸同舟之濟。庶諸彼岸之登。未及修辭。先蒙惠問。其爲感愧。罔旣敷陳。

答周運使

伏審瞻咫尺之威。親承臨遣。持光明之節。出畫轡將。泝峽良勤。褰帷云始。寬條旣布。輿論交欣。恭惟某官。學識疏通。材猷敏劭。從容醕酢。恢然游刃之餘。揚歷淹回。湛若重淵之靜。惟聖主不忘于遠俗。欲疲氓皆識于上恩。姑借重于澄清。卽進膺于遷擢。自惟承乏。所幸同寅。念請見之無由。辱移書之良厚。其爲愧荷。罔旣敷陳。

答趙運使

伏審寓直瀛洲。將漕夔峽。遠民良幸。輿論交欣。恭惟某官。以敏博之才。行仁厚之政。屬州縣水旱相仍之後。方倉廩朝夕不繼之時。賑給困窮。拊摩痼瘵。盜賊遠屏。流僮復還。旣課最之著聞。果詔音之褒擢。愛人利物。諒誠心之不移。問俗觀風。將惠澤之益廣。願惟承乏。游獲同寅。特承問訊之勤。殊感眷存之渥。其爲欣荷。罔旣敷陳。

答潼川提刑運使

伏審祇奉除書。游持漕節。休聲云遠。輿論交欣。恭惟某官。學識賅通。材猷敏劭。從容醕酢。恢然游刃之餘。敷歷淹回。湛若重淵之靜。暫紆使節。以惠遠方。惟此疲氓。困于重賦。利入已贏于十倍。安取厥餘。詔音雖

至于再三未知攸濟。當按臨之甫始。已利病之前知。切聞緒言。欲救宿弊。惟誠心之所格。終公論之必伸。應辰去德十年。邇風萬里。豈期甚幸。獲遂同寅。未遑問訊之勤。先辱緘題之貺。其爲感愧。罔旣敷陳。

答趙總領

伏審以其官召。亟奉于詔音。不俟駕行。式虔于君命。顧惟疎拙。久獲依承。三尺拘縻。莫陪于出祖。一隅留滯。徒仰于登仙。方欲修辭。遽蒙惠問。旣切違離之歎。更增愧荷之誠。恭惟某官。學識精微。才猷宏博。老而克壯。宿乃彌明。總出納于四川。竭勤誠于三載。宿師十萬。平居猶患于闕供。發軔再三。應猝每多于餘裕。游登卿列。簡在上心。式遄其歸。將益觀于遠畫。知與爲取。當宏濟于多艱。願庇護于寢蓐。以對揚于休寵。

答觀使韋節使

伏審揚于王庭。授以峻節。兼親賢之盛選。符中外之公言。某官美秀而文。威儀是力。仰紹金籙之學。藉甚家聲。久從琳館之游。超然物表。屬東朝之有慶。眷外氏之多賢。擇日設壇。特重麾旄之寄。比名併牒。更增跼尊之榮。自惟州縣之徒勞。所謂雲泥之相望。不敢輒修于賀問。迺蒙先鑒于緘滕。三命益恭。知寵光之未艾。多文爲富。顧疵陋以何堪。欣感之誠。敷陳罔旣。

答晁制置

召還萬里。擢長六卿。杖杜勤歸。蓋特矜于永久。積薪居上。竊自歉于後來。每念叨逾。豈勝戰慄。敢謂眷存之渥。特紓誨問之臨。譽雖過情。義豈云薄。恭惟某官。宏才任重。敏識造微。御史諫官。振直聲于多士。方伯

連帥流惠化于遠民。肆帝眷之惟新。舉坤維而盡護。雖節以制度。前追忠定之規撫。而薰然慈仁。蓋本文元之心。法顧惟疇昔。嘗獲瞻承。偶逃絀免之科。遂記踐更之契。三年無補。既蒙藏疾之私。一旦誤恩。並出噓枯之論。道路云遠。情文益隆。惟感愧之所并。豈敷陳之能究。

回總領王郎中

伏審進登郎位。外總軍儲。始布教條。一新觀聽。恭惟某官。器能敏裕。識慮高明。知無不爲。期竭忠而尊主。言底可績。恥譁衆以取榮。踐揚居多。名實兼茂。乃眷上流之重。方嚴勁旅之屯。陸走水浮。轉輸之費增倍。頭會箕歛。痼瘵之民未蘇。竊聽平生之言。每懷憂世之志。將使公私之均濟。佇觀次第之設施。益懋遠猷。亟膺大任。方圖修問。遽辱賜書。既懷不敏之慚。且見相先之誼。其爲感佩。罔既敷陳。

答李提刑

伏審欽奉詔書。洊持憲節。先聲云及。輿論交欣。恭惟提刑敷文。識慮精明。才猷宏博。仙李之根遠矣。世德彌芳。常棣之萼韡然。相門未艾。視彼黃閣。實吾青氈。而乃俯就外官。坐成遺老。郡守監司之寄。幾徧歷于四方。門生故吏之餘。或先登于要路。矧茲夔峽。亦辱使軺。庶獄紛紜。幸平反之無害。疲民凋瘵。賴賑卹之有方。苟種德之可爲。豈屈身之足問。顧惟嬾拙。久幸依承。茲復同寅。庶幾豪益。枉誨音之良厚。知眷意之特隆。感媿之懷。敷陳罔既。

回程提舶

嘔遠風度。洊易歲華。各在一隅。殆將萬里。心雖無間。迹若相忘。茲被命以言歸。幸邇風之稍近。方圖修問。遽辱貽書。見眷予之不忘。審起居之多福。恭惟某官。才周浩劇。識究精微。屈伊洛之名家。臨夷蠻之互市。海舶四集。益豐財貨之源。官曹一清。無復脂膏之潤。已被褒嘉之渥。卽膺進擢之優。應辰方此。丐閒庶幾養病。無從披晤。第切傾馳。塵冗所叢。敷陳罔既。

答勾龍提宮

祇奉詔除。叨分閫寄。惟蜀地實同于齊魯。而漢朝繼出于淵雲。究觀源流。想見人物。方願聞其姓字。遽辱貺于書詞。情文並隆。感慰何已。恭惟某官。材猷敏劭。學識疏通。踐揚久著于賢勞。斂退樂從于閒適。賢不家食。方屬于明時。士有特招。佇聞于休命。將遂披瞻之願。更祈寢饋之闕。向往之誠。敷陳罔既。

回通判徐提宮

爲郎無補。久宜襁被之行。將母有求。輒冒分符之寄。地當旬服。里有仁人。方幸親依。遽蒙問訊。執謙過厚。知鄉黨之恂恂。養志自如。審吉祥之止止。恭惟某官。材猷敏劭。學識高明。發游刃之新硎。自諧節奏。策要津之高足。豈限期程。何洊佐于藩條。復退安于祠館。其室則邇。雖未遂于趨風。厥木惟喬。竊有期于庇賴。

答馬舍人

奔走遠宦。經從治邦。項背相望。問勞之詞。狎至。肴核維旅。殷勤之意。有加。屬旣領于郡符。恍已更于歲籥。未遑修問。又辱移書。益諗眷存之隆。且增遲鈍之愧。審豈弟之多裕。固祥福之大來。恭惟某官。器蘊淵閎。

風猷凝遠。崛起蜀道。明揚漢廷。講經書之業于禁中。裁訓誥之文于天下。暫茲出守。行卽召還。念請謁之無繇。冀寢興之愆護。其爲向往。罔旣敷陳。

答程運幹

習聞聲跡。深歷歲時。敢謂眷勤。首紆誨問。講修先世之好。曲示過情之褒。感莫能名。媿無以稱。恭惟運幹學士。受材膚敏。制行溫恭。趨而過庭。親承問學之富。行不由徑。益見操修之堅。凡士論之所期。曰家聲之是似。顧惟晚進。及識前修。仰風烈之如存。喜典刑之有繼。末由造請。第切傾馳。倍覲保綏。亟膺進用。

答查運判

竊以自昔才難。莫如閩外。于今任重。尤在蜀中。豈意空疎。亦叨寄屬。柁舟遡峽。幸險阻之無他。入境觀風。歎撫綏之未易。伏辱眷私之舊。特迂誨問之勤。此蓋運使直閣。持自牧之謙。篤相先之義。兩喜必多溢美。顧莫稱于褒揚。久要不忘平生。願繼聞于告戒。其爲感慰。罔旣敷陳。

回鄭狀元啓

伏審某官。條陳大對。首魁諸儒。凡在見聞。莫不稱羨。三年之科第尙矣。而獨被主上親擢者尤榮。一日之文詞燦然。而素爲公論推重者未易兼此全美。藹然休聲。應辰頃奉詔音。俾司貢士。方竊得人之喜。庶逃不職之愆。辱都騎之過存。貽長牋而見寵。徒增感慰。罔旣敷陳。

答吳殿撰

伏審某官俯就一麾。僅逾三月。正己以率下。節用而愛人。郡吏承風。皆有簡書之畏。疲民受賜。復知襦袴之溫。方切依仁。遽聞易地。奔走投牒。皆願于挽留。喧呶盈庭。不容于揮卻。念下情之難壅。因上奏以具聞。豈期道路之傳。特辱音題之貺。既欽勳勩。復見謙沖。感愧之私。敷陳罔既。

回王尚書賀吏部侍郎

仰承帝制。攝貳天官。私切省循。倍增戰慄。伏念應辰稟生不腆。處世多艱。頃待盡于松楸。俄備員于館閣。摧耗百憂之後。不自意全。低回多士之中。焉能爲有所宜。汰斥乃爾。叨踰以非材。而領銓曹之繁。以不學而參法從之列。性既疎拙。勢復羈單。冒昧而居。顛隤是懼。豈謂某官沈潛而樂易。篤實而疏通。久要不忘平生。每致眷憐之意。兩喜必多溢美。更加獎引之詞。念修謝以未遑。辱移音于先及。其爲感愧。罔既敷陳。

答陳安撫

謬分閫寄。洊閱歲陰。徒殫夙夜之勞。每切淵冰之懼。茲蒙賜召。得遂終更。釋重負之千鈞。稍寬疲茶。望故園之三徑。漸卜歸休。初非敢期。竊以自幸。伏蒙某官篤同寮之契好。念遠戍之艱勤。貺以尺書。問其行李。雖愧過情之譽。敢忘私淑之仁。屬道路之奔馳。幸門牆之密邇。卽瞻符采。敬布腹心。欣慰之誠。敷陳罔既。

回洪州鄧安撫

陳力無補。敢曰厭承明之廬。誤恩過優。乃使修連帥之職。兼程就道。卜日交符。惟仁人之所居。蓋民俗之甚厚。庶幾蒙潤。遽辱賜書。既慚溢美之言。且見必恭之義。恭惟某官材猷宏遠。學識高明。攬轡登車。早著

澄清之最。輕裘緩帶。游推鎮拊之功。宜還本朝。以究賢業。敢祈密護。前迓殊休。向往之誠。敷陳罔既。

回季安撫

伏審祇奉詔音。鎮臨邊郡。申令一下。旗幟爲之精明。歡謠四傳。市驛至于騰貴。伏惟安撫觀察。才猷敏劭。識慮疏通。踐揚茲多。忠謹彌著。得聲梁楚。宜克紹于世家。率服蠻夷。今正需于方略。佇聞政績。以稱上恩。應辰屬在鄰封。實依庇貺。未遑貢問。先沐移音。欣感之誠。敷陳罔既。

回王安撫

竊承帥節。俯鎮邊城。惟游刃之有餘。庶同舟而獲濟。未遑修問。先辱移書。情文並隆。感愧參集。恭惟知府安撫中大材。猷敏劭。氣守堅明。臨繁劇而不辭。雖多益辦。忤貴權而無悔。于義必爲。復用于聖君。獨斷之時。歷任于戎事。方興之際。忠勞尤著。夙迹具存。乃眷瀘川。實兼戎索。式倚懷柔之略。益觀悠久之規。豈惟拙疎。得所憑藉。尙阻披承之便。更祈寢饋之調。

又

伏審升華法從。作鎮雄藩。自京邑而拊遠方之民。以文儒而易武吏之政。委寄時重。寵光一新。觸熱視師。諏辰開府。恩威已著。觀聽交欣。恭惟某官。學識高明。才猷敏裕。穎悟于眇綿之表。立則參前。從容于肯綮之間。發皆中節。處艱難而功效愈白。治浩穰而風力益彊。荆居上流。晉比分陝。爰輟近侍。以分顧憂。某久焉去德。茲乃爲鄰。所幸輔車之相依。庶幾葵藿之不采。方圖修問。先辱移書。感愧之誠。敷陳罔既。

答張都大

伏審欽承詔音。就畀使指。總按秦蜀。拊綏夷蠻。盡操閭閻之權。馴致富強之業。委寄甚重。觀瞻一新。恭惟都大直閣。學富多文。才周萬事。穎悟于眇縣之表。立則參前。從容于肯綮之間。發皆中節。洊奏澄清之最。遂膺擢任之優。董茶如飴。外通關市之利。馴鐵孔阜。內壯師干之容。必且不勞而功成。可使所居之官大進。登要近。益究猷爲。應辰久矣。邇風幸將展謁。豈獨謹簿書之期會。庶幾聞議論之緒餘。未及修辭。先蒙惠問。其爲感愧。罔旣敷陳。

又

欽承告命。優進職名。不獲終辭。第慚非據。竊念某。學皆陳腐。事每闕疎。久滯近班。無補聖世。可當一面。誤被于詔除。比及三年。蔑聞于善最。心已疲于大用。齒復迫于始衰。疾病交侵。形神俱敝。猶幸黜幽之未及。庶幾置散之爲安。旣莫遂于私誠。乃就更于華序。進退失措。起居靡皇。茲蓋某官正始名流。老成厚德。同舟而濟。夙幸于依承。有味其言。每形于獎予。曲成虛譽。馴致誤恩。更蒙誨問之臨。尤見眷存之厚。其爲感愧。罔旣敷陳。

回續都大

欽奉詔音。謬分閫寄。捫參歷井。敢憚驅馳之勞。臨淵履冰。未知填拊之策。瞻言宿德。隱若外臺。豈徒庇賴之蒙。復有交符之幸。人惟求舊。尙眷記之不遺。政必告新。庶拙疎之有望。方圖修問。先辱賜書。情文並隆。

感悔何似。恭惟某官。才猷敏劭。學識高明。風流追配于前修。輩行獨先于多士。戶口百萬。鎮荆楚之上流。駸駸三千。總蠻夷之互市。皆第功而居最。姑增秩以示褒。宜還本朝。益究賢業。將遂參承之願。更祈寢饋之調。欣仰之誠。敷陳罔既。

又

伏審祇奉茂恩。進升美職。重斯文之論議。慰遠俗之觀瞻。恭惟某官。學識高明。才猷宏博。游更要劇。久矣賢勞之多。徧閱後來。蔚然明德之舊。非特典司於圻牧。實惟撫輯于蠻方。最課著聞。褒章亟下。佇還大任。益究遠猷。應辰茲幸。依仁。方圖修問。先辱惠音之厚。益知秉德之謙。欣荷之誠。敷陳罔既。

答陳都大

伏審進直道山。出宣使指。在垆之野。欲馴致于富強。自陝以西。俾悉歸于廉按。先聲所暨。輿論交欣。內顧拙疎。獨蒙知照。藐然孤宦。越在一隅。豈無他人。念孰爲于久要。莫非王事。尤有賴于同寅。乃幸依仁。遠勤惠問。竊承溯洄萬里。縣歷三時。神明相休。啓處禔福。恭惟都大直閣。器涵剛實。學造淵微。惟于義以必爲。故所至而可紀。好是正直。自處于靖恭。範我馳驅。不期于詭遇。雖稍淹于進用。益足見于安恬。蜀道惟艱。秋陽尙熾。將遂披承之願。更祈慈護之宜。欣仰之誠。敷陳罔既。

答夔路范運使

遠去使華。游更月朔。審及瓜之既代。謂行李之且來。拳拳此心。日日以俟。伏奉手誨。如聞足音。屬梓鬱之

未蘇宜起居之有相。恭惟某官家傳正學。躬受偉才。見義必爲。守職不撓。已騰漕最。益著賢勞。雖錦里逢迎。將獲親于餘論。而鋒車趣召。諒非久于遠方。更祈保綏。以副傾屬。

答樊運使

伏審祇奉詔音。涪持漕節。地連榆社。初無叱馭之勞。民愛棠陰。皆望塵之快。恭惟運使中大。清明亮直。寬大惠和。久矣踐揚之多。居然聞望之懿。力辭籲召。志樂燕閒。就乘使華。姑爲井絡之重。進裨袞職。終倚樊侯之賢。卽觀晚之功名。前繼古之風烈。顧惟疎烈。夙仰者明。傾蓋雖新。情實均于久要。同舟以濟。幸將托于餘光。未及修辭。先蒙惠問。其爲感愧。罔旣敷陳。

答范運使

竊承賢哲。實董輸將。仰游刃之有餘。庶同舟之獲濟。未遑修問。先辱移書。情文並隆。感慰何已。伏惟某官。炳靈秀氣。奕世清芬。學得純全之傳。才周左右之用。閱職寢久。蜚聲益休。尙紆使華。以惠遠俗。矧發軔再三之後。民力已疲。雖算緡百萬之多。軍需僅給。方講求于寬卹。尤有賴于將明。益究遠猷。進膺大任。將遂披承之願。更祈寢餼之調。欣仰之誠。敷陳罔旣。

答馬運使

伏審祇奉詔音。典司漕計。矧出守之惟舊。而去思之尙新。迨茲持節之復來。翕然比屋之相賀。不勞施設。可致澄清。恭惟某官。禮備中和。學窮浩博。近侍親承于言動。直前屢効于論思。敷釋精微之經。納乎聖聽。

裁成雅奧之訓。揚于王庭。已斂惠于兩州。猶宜風于一道。佇膺大任。益究遠猷。應辰黽勉。一司因循。浹歲。僅同贅附。正賴波餘。敢謂眷勤。先貽問訊。其爲欣荷。罔旣敷陳。

答利路張運使

謬領帥符。獲同王事。于彼原隰。徒想于光華。畏此簡書。莫諸于請謁。敢謂眷存之厚。洊紆問訊之勤。審臨按之多餘。固吉祥之畢集。恭惟某官。質直而義。參和以仁。遍閱後來。蔚爲久次。肅將使指。方轉輸以備邊。仰繼世家。宜孝友之處內。尙祈慈護。益迓殊休。向往之誠。敷陳罔旣。

回江東向運使

伏審祗奉詔書。出持漕節。賢才復用。公議少伸。恭惟某官。器蘊恢閑。機神穎邁。慷慨于艱危之際。義不辭難。從容于盤錯之前。動皆中節。間者退藏之云久。居然涵養之愈充。豈容與世以兩忘。果爲斯民而再起。觀其所主。實爲元老之薦揚。欽乃攸司。已見外臺之增重。行膺大任。益究遠猷。應辰夙仰。高風喜聞新命。未遑修問。先辱賜書。感愧之誠。敷陳罔旣。

回周運使

伏審持外臺之使節。已布寬條。錫內史之贊書。始承新渥。坦然明白。遠有光華。恭惟運使朝議。學識該通。才猷敏劭。踐揚云久。左右具宜。眷言夔峽之轉輸。擇材方急。不待漢庭之臨遣。授任卽行。申以絲綸之言。煥乎原隰之寵。不違咫尺。豈徒盡臣節之恭。罔墜周旋。有以稱淵衷之厚。卽觀最課。前迓殊休。應辰洊獲。

同寅每勤惠問其爲感愧莫旣敷陳

回賀陳運使

伏審欽奉詔音肅持漕節以御史按郡國示內外之惟均。以儒者理貨財。欲本末之有序。上意可見輿論交欣。啓行實始于七閩。采入更踰於三峽。雖徒馭備嘗于險阻。而神明實相于忠嘉。恭惟某官學窮淵源。行中繩準。蚤蜚聲于俊域。寢策足于憲臺。範我馳驅。不期于詭遇。好是正直。自處于靖共。懇避要塗。出宣明命。如蜀部之西僻。亦使星之下臨。遠俗有光。疲民何幸。願惟疎拙。夙荷照知。庶幾承議論之從容。豈特謹簿書之期會。方圖修問。遽辱移書。欣荷之誠。敷陳罔旣。

答王運使

法當薦士。歲有定員。敢不盡忠。庶幾報國。豈謂眷存之厚。特形遜謝之詞。雖云私書。是協公議。恭惟某官心存仁厚。體備中和。寬而本之以明。正而持之以重。消田里之愁嘆。已著政聲。擁原隰之光華。復登課最。卽膺大任。乃慰公言。自顧拙疎。何能輕重。徒增感愧。罔旣敷陳。

又

伏審肅擁漕節。按臨益州。教條一新。觀聽咸喜。恭惟某官允迪厥德。參和以仁。澹若重淵。非澄撓之能動。恢乎游刃。蓋剗裁而有餘。休聲亟著于本朝。使轍幾環于全蜀。洗岷峨之悽愴。益懋遠猷。浮江漢以朝宗。卽登近列。顧惟衰病。方幸退閒。駐蹕之徑其空。旣茲窮僻。馬牛之風不及。矧復阻脩。忽蒙惠問之臨。特厚

膏寮之契。其爲感愧。豈易敷陳。

答新嚴州張倅

遠過十載。婉音問之闕然。屏居三衢。幸車從之至止。未遑布訊。先辱移書。不忘平生。良欽于厚誼。旣見君子。將慰于夙心。恭惟某官。性資高明。器蘊端厚。故國喬木。共仰世臣之存。百川狂瀾。獨傳家學之正。勉隨官牒。待飲藩條。卽聽休聲。益光前烈。歲華逾盡。陰氣沍寒。更冀保綏。以符傾繫。

回興業秦知縣

叨被恩除。來丞郡寄。誦韓吏部之句。地實在于湘南。求溫處士之廬。羣已空于冀北。方懷風味。遽辱音題。旣荷芬若椒蘭之情。又知敬止桑梓之義。自顧涼薄。何以戡承。伏惟某官。學通聖言。名播士類。千室之邑。諒宰割以何勞。九層之臺。抑階升之有漸。佇聞休命。益究遠圖。更冀保綏。以符傾禱。

答董知縣

伏審勉強宦牒。來領縣章。凡在庇庥。皆相欣慶。恭惟某官。富于學殖。蔚以文鳴。仲舒之黜百家。實傳素業。冉求之宰千室。姑踵常塗。卽聽治聲。遂膺休命。顧惟疎拙。獲遂退閒。方幸依仁。遽蒙惠問。其爲婉荷。罔旣敷陳。

回玉山知縣

桑梓之邦。久依善政。萍梗之跡。越在遠方。茲幸言歸。將諸造請。先辱惠音之厚。殊欽眷意之勤。恭惟某官。

德履粹和才猷敏劭。俯循近制。出宰斯民。簿書雖繁。自得剴裁之要。旱潦相繼。尤殫撫字之勞。卽聽休聲。遂膺異數。念承顏之伊邇。先引領以載欣。

回新吳江趙知縣

佐州于此。弛擔之初。惟十年不見之故人。在一葦可杭之比境。未遑修問。遽沐移音。殷勤若接于笑談。俯仰恍疑于夢寐。伏惟某官。處心仁厚。持己方廉。如不勝衣。孰識王孫之貴。可使爲宰。姑從吏部之銓。曲敦雅素之歡。彌見攜謙之美。其室則邇。無因而前。瞻詠之勤。敷陳奚旣。

回萬載知縣

伏承都騎來領縣章。聞名久之。聯事幸甚。伏惟某官。以能自奮。所至可稱。位雖未充。亦云寄百里之命。志必有在。不獨爲三徑之資。自憐別駕之何功。竊冀同舟而獲濟。特紆問候。況佩勤誠。

回嘉興李知縣

伏以嘔違既久。瞻望益賒。闕然嗣音。是以負媿。辱書詞之甚寵。知眷注之不忘。欣承起居。倍納休福。恭惟知縣學士。材猷敏劭。學識該通。俱水風流。從來者遠。常山政事。已去而思。惟今嘉興。素號劇縣。戶口億計。舟車四通。諒惟高才。綽有餘力。卽登課最。行奉詔褒。益懋遠猷。以繼前烈。應辰守官。窮僻與世闊疎。無復趨承之期。第勤向往之望。

回山陰汪知縣

叨被帝俞。出分郡寄。雖便私之良幸。顧治劇之非長。敢謂聽聞。特貽問訊。執謙過厚。知鄉黨之恂恂。爲政多餘。審吉祥之止止。恭惟某官。材猷敏贍。識慮疏通。乘朱輪者十人。夙推世閱。綰墨綬于百里。姑試賢勞。已著休聲。卽膺異數。尙祈慈護。式副傾瞻。

回高知縣

拜恩佐郡。諏日造官。竊企風猷。獲聯職治。伏惟某官。譽推月旦。節貫歲寒。尙沈下僚。雖未究于賢蘊。以望此府。諒無媿于前修。惟昔試言。蓋嘗接武。旣歲月之云久。亦江湖之相忘。豈期于今。復適所願。未遑通問。先辱移音。感愧之誠。敍言罔旣。

答玉山宰謝薦

備數禁塗。尤宜報國。投閒祠館。無所效功。惟于薦士之定員。尙有銓曹之著令。庶幾塞責。乃辱移書。祇服謙勤。第增悚戢。恭惟某官。家傳碩學。躬蹈清規。出宰斯民。已休聲之藹蔚。進膺明命。豈常制之拘攣。更冀保綏。卽聞褒擢。

回宜春黃知縣

奔走一官。飄浮五嶺。蓋人跡罕至之地。亦交情可見之時。敢期百舍之遙。俯致雙函之訊。唱高風而敦薄。發妙語以噓枯。肝膽輪困。倍切窮途之感。親戚警歎。少寬去國之思。欣承撫字之餘。坐擁休祥之至。伏惟某官。材猷敏贍。明識高明。叔度如萬頃之陂。源流有自。冉求爲千室之邑。兩地何勞。卽慶超遷。以伸久屈。

好黼藻其德。願益勵于遠猷。毋金玉爾音。尙不忘于惠教。

答關知郡

采入益州。脩焉四載。仰望冊府。藐如九霄。竊承厭直以西歸。茲亦罷官而東下。邂逅相遇。幸獲僨于夙心。雍容甚都。庶復見于今日。側聽挈音之近。遽蒙尺牘之臨。恭惟某官。學識造微。文章爾雅。方問津于要路。乃力請于分符。雖不敢寧息。方從奔走之勞。而願延須臾。少奉話言之益。其爲欣慰。罔旣敷陳。

答吳知郡

伏以帝念邊郡。詔用儒臣。因其別駕之功。授以刺史之印。效旣已試。去方見思。迨此復來。翕然相賀。恭惟知郡朝議。道心恬澹。世務該通。出其蓄蘊之餘。發爲醕酢之妙。奏課連最。必將益著于治聲。終更亟還。矧已豫頒于召命。佇膺大任。悉究遠猷。應辰洊獲同寅。庶幾蒙益。辱書見及。荷意良勤。

回新劍南傅知郡

伏審祇奉詔音。就分郡寄。瓜時甫及。輿議交欣。恭惟某官。元祐輔弼之門。靖康忠義之後。能濟其美。有聞于時。藐是遠方。久于隨牒。其容不改。所養可知。暫煩一麾。以福千里。佇凝最課。卽踐要津。竊承前驅。將壓近境。方喜披瞻之在。卽遽蒙問訊之良勤。感愧之誠。敷陳罔旣。

回新化州知郡

伏審祇奉詔俞。洊膺郡寄。遠民幸甚。公論宜之。伏惟某官。持己方廉。處心仁恕。惇兮若樸。自忘健羨之心。

巋然獨存。益見後凋之節。俯就漕臺之選。聊分越徵之符。諒久屈之當伸。將大來而莫禦。應辰方圖貢問。先辱移書。仰謙德之有光。撫懦衷而增感。

回化州知郡

衣冠之盛。昔嘗仰邇于名門。襦袴之謠。今復稔聞于比境。蓋欲修辭而未果。豈期惠問以相先。稱譽過情。避敢稽于三舍。文章溢目。重何翅于萬金。伏惟某官。世系高明。天資翹爽。敏悟于幾微之表。從容于肯綮之間。嶺外一麾。諒不勞于游刃。日邊三節。行即奉于清光。賓閣尙賒。歲律云晏。敢祈慈護。以迓亨嘉。

答安李知郡

伏審祇奉詔音。進紆郡紱。瓜時而往。靡辭裨暑之勞。穀旦于差。卽布先庚之令。恭惟某官。家傳袞繡。業茂箕裘。文采夙成。已出諸儒之右。材能小試。復高別駕之功。始以序升。乃茲出守。矧庭闈之就養。復伯仲之連城。石君一門。孟子三樂。其爲希有。夫豈偶然。屬叨分闔之嚴。實賴同舟之濟。移書見及。荷意良勤。感媿之私。敷陳罔旣。

答信州唐知府

伏審厭直蓬瀛之祕。分符吳楚之交。下車云初。闔境咸喜。恭惟某官。學覃浩博。辭富英華。旣聲名之甚都。復文行之相稱。好是正直。確守家世之傳。範我馳驅。退安郡紱之寄。雖少淹于遐躅。實少惠于疲氓。卽聽詔音。以愜公論。應辰衰悴。晚景羈栖。異鄉竊欣桑梓之邦。獲被袴襦之澤。未遑修問。先辱賜書。慰荷之私。

敷陳罔既

答信州王知府

伏審欽奉詔音。游紆郡紱。地兼吳楚。實當水陸之衝。名繼趙張。咸仰世家之懿。恭惟某官。材猷閎博。識慮高明。黃閣調元。蓋源流之有自。朱轡共理。果風迹之特高。眷惟信美之邦。復藉惟良之政。諒因民之所利。必易地以皆然。卽聽休聲。亟膺異數。應辰猥緣鄉井。獲在部封。念修敬之未遑。辱移書而先及。其爲欣荷。罔旣敷陳。

答潼川張知府

伏審寓直西清。分符東蜀。以曲從于懇請。故特示于褒優。下車云初。浹境胥慶。伏惟某官。得先天康節之學。俟後世子雲之知。其無施而不宜。蓋有本者如是。被召殆行于萬里。爲郎僅及于六旬。卽當超遷。乃復外補。介于石故能不終日。良其背所以不失時。實斯道之固然。抑遠民之幸甚。顧惟疎拙。游獲依承。特蒙惠問之勤。益見同寅之義。其爲感媿。罔旣敷陳。

回柳州萬司法

邂逅適我願。遽復語離。倥偬裝其懷。遂稽致訊。敢期眷記。先辱音題。繫獎予之甚隆。非庸虛之宜得。欣承動止。倍集吉祥。伏惟某官。天賦異能。家傳素業。六經成誦。昔已號于奇童。三尺司平。今暫淹于列掾。佇聞休命。卽步亨衢。所冀保綏。以符傾禱。

回新喻梁縣丞

疆封相錯。波所及者。君之餘。官守所拘。室則邇而人甚遠。曲貽惠問。仰服謙勤。伏惟某官。大材特殊。世美惟肖。一行作吏。雖久著于能名。再轉爲丞。猶未離于選調。猥緣識面之雅。誤辱賞音之求。方自困于泥塗。復何能于軒輊。其爲悚媿。未易敷陳。

回王縣丞

伏審載脂車轄。來佐銅章。得見可期。爲僚甚幸。恭以某官。生于名閥。好是懿文。賞以世延。姑一行而作吏。事非力致。僅再轉而爲丞。移書粲然。厚意勤止。其于感忤。未易敷陳。

文定集卷二十

祝文

車駕詣景靈宮朝獻祝香文

孟春

伏願誠心感格。神鑒昭臨。春日載陽。益廣發生之德。兆民允殖。悉蒙和樂之休。

孟夏

伏願倍迎神貺。茂對天休。家用平康。均庇萬方之衆。物無疵癘。悉陶一氣之和。

孟秋

伏願高真鑒臨。諸福填委。民之攸壻。皆涵泳于和平。歲以有年。永蠲除于疵癘。

孟冬

伏願衆真孚佑。萬福增隆。措民物于咸寧。浹華夷而均慶。

太廟別廟殿宇抽換柱木等畢工告遷神主還殿室祝文

前期奏告

伏以有覺其楹。敝宜改作。不愆于素。舊悉更新。將祇奉于神靈。復還安于廟室。仰祈昭鑒。俯諒忱誠。

奉安神主奏告

伏以頃命工師載新殿宇。揆靈辰而叶吉。奉匱主以還初。仰觀安安。永垂庇佑。

修武成王殿宇裝塑畢工告遷神像祝文

維師尚父。廟食學宮。棟宇寢隳。繕修甫畢。肆遷像設。還復故常。

仲春補種昭慈聖獻皇后殯宮永佑陵殯宮奏告表文

伏以增植園林。繕修棟宇。爰卜仲春之吉。式虔每歲之常。仰觀妥靈。俾諧庀役。

仲春補種安穆皇后安恭皇后殯宮祝文

寢園所寓。繕葺以時。屬此仲春。既諏吉日。將庀徒之云始。俾致告以惟虔。

祭文

祭張魏公文

嗚呼。輔相之業。必曰格天。嗟後世之籍籍。角巧力以爲賢。將導迎于善氣。必有與天爲一者焉。於維我公。體道之真。聖有謨訓。力行以身。念慮精一。不已其純。雖在閭室。如見大賓。移所以事親者事上。推所以愛己者愛人。任重道遠。白首日新。武夫悍卒。兒童婦女。聞公之名者。如仰日星。望公之貌者。如見父母。人之德。發揚普詡。綏之斯來。其孰能禦。然而變故百出。艱難倍嘗。拯神器于旣傾。遏大敵于方張。旣顛危之獲濟。亦進退之靡常。志雖馳于幽燕。跡乃滯于湖湘。二十年餘。再秉樞鈞。百未施其一二。復異說之紛綸。

蓋公之所能者天。其所不能者人。自古所嗟。今復奚云。方晏適于林泉。謂永綏于壽考。胡不慙遺。喪此元老。應辰自昔。出入公門。期式瞻于儀表。以畢願于斯文。孰謂此來。言無復聞。既念其私。復哀彼民。徒反袂而長號。淚淋浪而沾巾。嗚呼哀哉。

祭陳相國魯國文恭公文

惟公稟氣之和。體道之全。渾厚純粹。得于自然。端委廟堂。如山如淵。以公宰物。以誠格天。仁者之勇。德人之言。有發必中。有待必堅。密啓建儲。見幾之先。決策安邊。達事之權。四方既寧。聖主初元。公拜稽首。丐歸丘園。歸未暖席。詔書促還。勤勞王家。病不復痊。當寧震悼。塗人涕漣。嗟世之人。挾數矜智。公初無心。上益注意。嗟世之人。斂惠邀譽。公初無言。人自欽慕。生榮死哀。夫豈人力。一言以蔽。惟其盛德。應辰拙疎。公實見之。前後薦引。始終保持。聞公之喪。身在西蜀。有愧古人。不能匍匐。痛楚摧傷。怛然此心。萬里致奠。公其俯臨。嗚呼哀哉。

祭凌尚書文

惟公氣質粹美。學問純正。充養既厚。持守益定。視其容貌。如不勝衣。孰知其勇。見義必爲。聽其議論。如不口。孰知其直。言無所苟。謂公爲清。清而有容。謂公爲和。和而不同。人有一善。或以自矜。公終其身。兢兢靡寧。蚤以文鳴。出類拔萃。歷守五郡。所至稱治。進冠侍從。惓惓獻納。退領真祠。遂老苕霅。平生百爲。無一可愧。夫豈偶然。有本如是。年垂八十。古昔所稀。人猶望公。胡不期頤。矧如蠢愚。于世鮮耦。公獨忘年。俾與

爲友。其知以心。其愛以德。庶幾永久。得因蒙益。今則已矣。流涕橫臚。衰病疲茶。不能匍匐。緘詞千里。寄此心惻哀哉。

祭趙忠簡公文

維公兩登上宰。俱值阨危之時。一斥南荒。遂爲生死之別。莫非命也。豈有他哉。事旣定于蓋棺。恩特容于歸骨。僅脫鯨波之險。獲至于斯。孰謂馬鬣之封。未知所向。昔任昉無漬酒之彥。而劉峻廣絕交之書。吁嗟此風。何獨今日。念嘗游于幕府。忍自比于路人。冀以告哀。言不盡意。

祭待制兄文

嗚呼。念昔兄弟。幼小艱苦。在鄉井間。未嘗相捨。應舉得官。始出從仕。間有離別。聲問猶繼。惟是入蜀。萬里相望。尺書往來。動輒經歲。首尾五年。兄再還朝。我亦被召。似非偶然。始拜見兄。驚歎良久。語音雖存。形容非舊。雖得團聚。未嘗笑樂。求醫之外。不暇他語。未及期月。兄請奉祠。飲食稍增。意氣亦快。終朝接應。不見疲倦。謂言自此。身心俱閒。庶幾休養。漸復舊觀。如何不淑。遽聞訃音。惟兄平生。忠信孝友。出于純誠。表裏如一。立乎本朝。知無不言。不顧禍福。不徼名譽。雖有忤心。無所致怨。雖或異己。莫余敢侮。凡百君子。孰不流涕。矧惟手足。痛苦奈何。身廢于茲。欲往未可。陟岡望之心焉如割。嗚呼哀哉。

又

於戲。兄之云亡。于此五月。孤嫠無歸。浮寄異縣。營奉大事。艱苦萬狀。地偶得卜。葬遂及期。天實矜之。初豈

敢必念昔與兄同列禁從。兄既去國。誨言諄諄曰：宜退歸。行復相見。誰謂俯仰遂成永訣。瀝懇叩關。覲得引去。庶幾送死。猶可無憾。身非已有。事與願違。向風長號。孰知我哀。嗚呼哀哉。

祭女四娘子文

維年月日。爹爹媽媽。以清酌時果。庶羞之奠。祭于四小娘子之靈。自汝云亡。于今一月。追念痛苦。殆無生意。汝夫于汝。死生之際。竭誠盡力。汝而有知。可以無憾。今將舉汝之柩。歸卜葬于明州。于義當然。毋或驚怖。爲汝父母事。至于此。無可奈何。惟有撫養汝子。望其成立。庶能奉汝之祭祀而已。嗚呼哀哉。

銘誌

黃公墓誌銘

紹興二十有四年。應辰通判靜江。而黃君克己爲帥司僚屬。前此嶺南帥守盛司。相爲敵讎。屢起大獄。其僚各爲曹朋。以相傾軋。至是。餘習未殄也。而黃君純厚靜重。不見圭角。衆人方譁。而泊然如不見聞。往來諸公間。亦莫得而親疎也。余竊心重之。既而有習于君之家世者曰：此其家法有自來矣。因爲余言其先君子之詳。余歎曰：所謂故家遺俗者。此其是也。又六年。黃君以其先君子行實。屬余爲之銘。余固不敢辭也。乃攷其本末而敘次之曰：公諱陞。字進仲。殿中丞覺之曾孫。朝奉郎孝綽之孫。中奉大夫藝之季子也。世居建之浦城。至朝奉公遊東平。樂其風土。因家焉。公與二兄皆登進士第。而公則崇寧二年進士也。初授濟州鄆城縣主簿。丁中奉公憂。除服。爲真定府真定縣主簿。授鄆州南陽縣丞。丁母憂。服除。授順安軍

司戶曹事。改宣教郎。授襲慶府仙源縣丞。知真定府真定縣。廬州、合灤縣、邵州、永州主管。建州沖佑觀。台州崇道觀。又除知筠州。以紹興八年十二月辛未卒于臨安旅舍。積官至左朝散大夫。享年六十有五。諸孤以明年三月丁酉葬。公于撫州金谿縣、歸德鄉、傳禪山之下。公自爲縣佐。郡有事不能決。率以委公。輒辦治。真定帥遇吏屬嚴甚。動卽訶斥。公以主簿與之論是非。不少屈。帥亦不敢以他吏待之。合灤當兵興之際。州有急。一切賦取于民。公隨事力爭。有不得已。視其等衰而均之。吏不得並緣爲姦。民亦無怨。湖南大旱。米斗千錢。公在永。旣發官廩賑之。又勸富民出粟。猶不足給。乃請于連帥李丞相。願出諸司封椿粟以續之。丞相從之。沾丐一路。永民至今有遺愛焉。蓋公之爲人。雖平居縝密。似不能言。而剖析吏事。精明勇決。雖待人和易。惟恐傷之。而遇事有守。權勢不能奪也。終身小官。處之泰然。于書無所不讀。其文以理致爲尙。有家集十卷。娶魚氏。御史中丞周詢之孫。有賢行。封宜人。四男子。曰正己、右通直郎。曰克己、右通直郎。新知洪州。南昌縣事。曰行己、右從正郎。廣東市舶司幹辦公事。曰立己、未仕而卒。四女子。長適右修職郎。吉州永新縣令王田功。次適右朝請郎。通判黃州軍州事劉符。次適右儒林郎。通州軍事判官聶昇。又次適右從事郎。饒州錄事參軍孫聽。孫男四人。銘曰。

位不充德。其施也小。行浮于言。知者亦少。有子似之。不改其舊。天子善人。其報則厚。

御史中丞常公墓誌銘

御史中丞常公。旣葬後。十有三年。其孤裕。使其弟秩。以公之世次、官封、功行、來中都。泣請于應辰曰。孤裕

等。不天。惟先君子以直道事主上。盡言無隱。名節聞天下。不幸先君子無祿卽世。冢上之木拱矣。而隧碑未立。茲惟缺典。私心慙焉。子其爲我敘先君子光烈以信于遠。而先君子之死爲不亡。而孤裕等不孝之罪。或得以少逭。應辰作而曰。噫。先正猶日月也。非惡筆所能繪畫。追惟風采。起敬不忘。其闢熙豐之邪說也。如關申商。尊元祐之正論也。如尊周孔。故呂本中行公之詞。有曰。排斥異端。回狂瀾于旣倒。維持正論。發潛德之幽光。而張九成撰公之志。有曰。言路旣開。臺諫增重。異端旣黜。六經大明。世以爲名言。應辰復何所容其喙。扶請不已。應辰閱其誠而且哀。曰。敢不惟命。試掇其尤者識之。謹按常氏自鼻祖先相黃帝。厥後曰季。曰惠。曰林。曰爽。班班見于史傳。不絕至唐。而袁相代宗。唐末其孫宥仕于蜀。世爲邛之鶴山人。國朝尙書工部侍郎。諱元者。于公爲高祖。尙書屯田郎中。諱溥者。于公爲曾祖。大中大夫。諱某者。于公爲祖。監察御史。特贈右諫議大夫。累贈光祿大夫。諱安民者。于公爲父。光祿在哲宗朝。爲御史。論章惇如王鳳亂漢。林甫亂唐。論蔡京姦足以惑衆。辯足以飾非。巧足以移奪人主之視聽。力足以顛倒天下之是非。惇京比而讒之。入元祐黨籍。貧不能歸。乃徙于陳。公其仲子也。諱同。字子正。生而豐下。穎悟不羣。七歲侍光祿公。謏滌滌多山水。名公卿詩賦記文題刻殆徧。公一過輒能默誦。翰林學士曾公肇時爲郡守。見而異之。曾公嘗與客論近世君子小人。公前揖曰。涑水君子之魁。金陵小人之首。曾公喜。謂光祿曰。它日挺挺有父風。未可量也。十二歲。光祿授以六經之學。再三覆講。無一字誤。尤長于周官六典。圖其儀物。驗諸制度不差。一日光祿公詔之曰。吾老矣。汝其務求師乎。吾同年有元城劉先生。同里有宛丘張先生。當世

偉人也。汝欲學義理。當師元城。欲學文章。當師宛丘。于是公兩師之。二先生高以評目。政和八年。賜上舍及第。靖康初。上以大元帥置東南道都總管司。差充專管機宜文字。建炎二年。扈蹕南渡。除知大宗正丞。洎職廣右。四年。召赴行在。紹興二年。知柳州。又再召。三年入見。首奏今日之患。宰相之權太重。將帥之任太專。凡六事。累千百言。悉請更革。以彊國勢。除殿中侍御史。才十閱月。彈擊八十人。其間宰相執政四。侍從十六。郎官寺監官十三。監司帥守二十六。庶官十五。大將六。臺綱大振。中外肅然。四年。除起居郎。中書舍人兼史館修撰。朝廷命令有不允公論者。輒言之。坐是忤時宰意。以集英殿修撰知衢州。五年。請祠。以徽猷閣待制。提舉江州太平觀。六年。除禮部侍郎。七年。除御史中丞。奏疏凡五十上。所論皆小人。然所薦趙鼎、王庶、李彌遜、梁汝嘉、劉岑、張致遠、胡寅、張九成、魏矼、晁謙之、陳正同、孫道夫、徐度、朱松、張祁、黃鉞、李桀、閻丘昕、施廷臣、張絢、張戒、許忻、吳彥章等。率又舉之口而不筆之書。何者。退小人。公則任怨于己。進君子。公則歸恩于君也。八年。秦檜向子誼。請與金和。潘良貴請戰。公慮敵詐和。獨請善備。且奏曰。檜自金歸。受其大帥所傳密諭。陰爲金地。願陛下察其姦。臣嘗論其兄梓。今又論檜。臣與檜初無怨隙。獨爲國事爾。上命侍從同議。子誼堅執講和之說。良貴大叱之。交爭于上前。上驚欲抵良貴罪。及公奏事上。意子誼戶侍之除。公所薦必助子誼也。因顧問公。乃曰。前日以其才可貳版曹。而薦之。今日之事。則不然。子誼請和而附檜。曲在子誼。良貴請戰而忤檜。直在良貴。上不悅。因丐補外。以顯謨閣直學士知湖州。子誼良貴俱罷。當是時。趙鼎在廟堂。則奏曰。常某良貴誠得罪。不宜因子誼而出之。張致遠在給舍。則奏曰。不應以一

子謹失二佳士。張九成在講筵，則奏曰：「若以子謹之故，逐右史，又逐中司，非所以愛子謹。」在內如黃鏐，則詒書于公曰：「無將大車之詩，大夫悔將小人也。」其一章曰：「無將大車，祇自填兮。」其二章曰：「維塵冥冥，其三章曰：「維塵雖兮，以言君子之將小人，其初則自取汚浼，以致病稍盛，則能蔽掩，使不得光明之道，其卒也，壅塞而自重，其累才則薦之，而佞則斥之，于中丞乎何悔？在外如葛立方，則又詒書于公曰：「昔朱雲論張禹罪，成帝欲刑之，則辛慶忌死爭，王章直言，成帝欲戮之，則梅福申救，劉毅以晉武比漢桓靈，則鄒湛寬廣帝意，陽城論裴延齡不宜相，則張萬福揖衆稱賀，數子非有言責，猶自奮若是，況爲聖主耳目之官，以古之正臣自任者乎？身雖暫退，而忠節德義滋進矣。」蓋檜專主和，子謹專附檜，良貴廷叱子謹將得罪，公先論子謹以救良貴，及草章論檜，而公已罷，故諸賢皆惜公之去。當時公論其不可掩如此。九年，促召不就，請祠，得提舉江州太平觀，貧無立錫地，又徙于秀之海鹽縣精舍居焉。歷祠祿三任，至十三年，凡三召，又不就。檜嘗遣其客謂公曰：「人望所繫，莫如公，願幡然一出，毋持前論。」當以參知政事處，公語其客曰：「前日之不附是，今日之附非也。」吾寧老死丘園，豈忍上負天子，下負所學耶？檜益憾。十九年十二月十二日，以疾薨于海鹽之寓舍，享年六十。積官至左朝議大夫，河內郡開國侯，食邑一千七百戶，實封一百戶。天下學士咸歎惜之。二十年十月，葬于平江府吳縣長山鄉金山之原。公晚年自號虛閒居士，有古律詩表啓詞疏外制劄狀書序題跋傳記碑銘二十卷，名曰虛閒集，奏議十卷，烏臺日記三卷，多閒錄一卷，公自六經而下，凡子史百氏、天文地理、陰陽律呂、兵法字書，無不通達。雖事之多秋，筆不停綴，今藏書數千

卷大半手澤也。又嘗親校柳文，創刻于柳校。蘇子由古史及編宛丘張先生集，併刊于衢，以淑後學。其記衢之學，必推明孫明復、石守道、胡翼之、李泰伯、邵堯夫、程正叔之道，俾諸生有所矜式。湖之郡博士吳元美，能以翼之學規迪湖人，則力薦于上。公前後三典名郡，其政必以儒飾，皆爲立生祠焉。公爲人凝重端方，遠夷鯁亮，明而不察，直而不訐，嚴而不苛，仁以庇民，智以利物，勇以興利除害，論事人主前，聲震不倦。如乞減月椿，免折民居等事，咸以爲便。乞減鹽法，留宿遷縣降附等事，活人以千萬計。信乎有德者必有言也。初娶太子少師滕公友之女，累贈大寧郡夫人。後娶大中大夫方公元脩之女，累封文安郡夫人。男八人：裕、奉議郎、新通判武岡軍禮、朝散郎、新通判湖州棹、奉議郎、知江州德化縣、彬、承奉郎、知紹興府蕭山縣丞、裨、承務郎、早世、株、承奉郎、新知宣州寧國縣丞、秩、承奉郎、監潭州南嶽廟、衿、承奉郎、女二人。適蘇玘、方導，皆名父之子。將通籍，孫男十人：叔孫、御孫、季孫、濬孫、昌孫、顥孫、盈孫、漢孫、詵孫、林孫。孫女四人。尙幼。初公與康與之並鄰居，與之以里中子弟謁公于湖，以養母爲請。公創一檢察御書之員，月賙緡錢三萬俸奉甘旨，與之乃不以爲養。公聞之愀然，因採取數月，徑致其母，與之執執去，而之平江，求一妓女于知府事周三畏，而通判蘇帥德公亞壻也。知公絕與之，止而勿與。與之望公及二君，迺告于檜曰：「常某死，三畏屬師德爲文祭之，有曰：『姦臣在位，公棄而死，檜爲之震怒。命承俞堯弼、勅三畏鑄職，命提舉浙西茶鹽公事王珪、鞠師德與其子玘于獄。』且遣吏卒夜圍公家，似若捕囚辟。公夫人與裕等惴息待罪，迄無之。僅脫虎口，然檜猶切齒。將俟裕等于祿，因以羅織。裕等終檜之世，不敢調。檜亡之明年，公以左中奉大

夫致仕以左通奉大夫追贈之命方繼下。後以諸子遇恩累贈至特進。嗚呼。嚮非天祐正人。不其殆哉。應辰昔備員策府。嘗因轉對。及和議曰。上下相蒙。深爲可憂。而檜亦以爲忤己。擯之去國。公時爲中執法。不因晚出。嘉其臭味之同。繇是受知。非一日矣。應辰亦以檜亡之明年。蒙恩召對。累遷至于邇列。而裕以發明公之事業見委。秩又來請汲汲檜亡矣。可以銘矣。銘曰。

常氏鴻牒。代有顯人。粵黃迨唐。二相秉均。委質皇朝。再世御史。皇極之扶。是父是子。元祐分察。斥惇與京。紹興執法。斥檜姦朋。人不敢言。而忠而讜。嶽嶽枋臣。竟誣以黨。惟明天子。鑒父子忠。其亡斯閔。其存斯容。又子又孫。盛德之驗。人懷死羞。公罔遺憾。太湖之濤。長山之顏。山高水深。妥靈其間。凡百君子。仰止嘉則。刻詩于碑。備太史擇。

文定集卷二十一

誌銘

徽猷閣直學士右大中大夫向公墓誌銘

紹興二十有三年三月辛亥。徽猷閣直學士右大中大夫致仕河南向公。以疾終於家。歲七月庚申。葬于臨江軍清江縣建安鄉之金澤。既而公之子以武夷胡宏所狀公之行以來請銘。某晚進。公實屈折行輩與之交。凡公平生出處大節。類多得于見聞者。屬未及秉筆。而遭罹家難。待盡山谷。自分已矣。既除喪。公之子復以爲請。乃次序而銘之。距公之葬。蓋十年矣。公諱子謹。字伯恭。世爲開封人。丞相文簡公之五世孫。欽聖憲肅皇后之再從姪也。曾祖傳範。汝州觀察使。贈太尉。諡惠節。妣萬年郡主趙氏。東海郡君徐氏。祖繪。太子右贊善大夫。贈正奉大夫。妣碩人曹氏。太碩人李氏。考宗明。武德大夫。妣永國太夫人李氏。公生而秀異。自幼凜然。如成人。敏悟強識。迴絕流輩。元符三年。以後復辟。推恩補假承奉郎。明年后崩。又以遺恩遷雄州防禦推官。監濱州鹽酒稅。東南建帥府幕屬。自朝廷選除公鎮南軍節度推官。臨事不苟。數與帥爭議可否。府中畏服。改宣議郎。監儀鸞司。公恥與閹寺共事。乞歸吏部。改眞州司錄事。權知開封府咸平縣。豪民馬氏倚蔭犯法。獄具上。府尹盛章方以圖空覲賞。卻不受。公直以聞。詔許自論決。章大怒。劾公以修學市木。不如其直。請御寶特勒停。久之復官。監杭州洞霄宮。除淮南江浙荆湖制置發運司主管。

文字淮南連年旱漕不通。有欲浚河與江淮平者。內侍主其議。無敢可否。發運司檄公行視。公以爲運河高江淮數丈。河至江淮。凡數百里。欲通之使平。萬萬無此理。前此有司率三日一啓閘。復作澳以瀦水。故水不乏。比年行直達之法。重以應奉往來。啓閉無朝夕。復何暇歸水乎。昔之堰閘。往往不存。今第修復。故迹嚴其禁約。則無患矣。所條畫盡悉。使者用其言。漕復通。朝廷嘉之。遷秩一等。召對。除淮南轉運判官。陛辭。力論財用所以不足故。且言伏見手詔應奉司所費皆從中出。語未畢。上曰。誠不欲費漕。公對曰。郡縣奉行惟恐不及。豈知陛下聖意所在。因言朱勔挾應奉爲姦。至一大石。用八百餘舟。公爲欺謾。莫敢誰何。兵夫不可校虛實。一網所費。毋慮數千緡。甫及官軍支請之期。則奪之。故其下籍籍嗟怨。上曰。待委卿覺察。公曰。微臣疎遠。付以此事。則死無日矣。上曰。朕未嘗姑息此輩。凡事直以聞。卽降御筆付公。云。應奉綱悉從御前給。外路不合支。繼有旨。委公專一覺察。應奉騷擾違法者。公旣至。率以法繩之。勦雖素橫。亦少戢。淮上帥守往往挾權貴爲重。公按治無所避。宿亳通海。四州饑。方移真揚米賑之。發運司乃言江淮米賤。乞均糴。而淮南當四十萬斛。公力論其欺罔。取所在實直以聞。于是不悅者益衆。俄罷去。金人逼京師。淵聖卽位。召公將以使軍前。公曰。李鄴已屈膝于金人。乞先定相見之禮。迺可往。或謂公不能屈。恐誤事。乃已。除京畿轉運判官。公上言。國初運東南糧于京畿。初無限量。元豐中。歲用百三十萬石。以卸納稽滯。始以百五十萬爲額。崇寧初。以六十萬入中都。始以九十萬爲額。至宣和末。得十萬而已。蓋十餘年中。兩浙漕臣皆權幸姻舊。止以入京六十萬較殿最。而京畿使者不復究其本末。故兵食常不足。乞自今兩

浙殿最從京畿覆實。是歲十一月終，已得七十萬。其後京城再圍，諸道兵集，率賴其用。除右司員外郎，詳議戶房檢討官。執政者不咸公度，不能從容其間，引嫌不就。乃以直祕閣爲京畿轉運副使，且詔公相度漕計。公言：祖宗置發運司，經制六路財賦，法令周密，其爲利甚博。今轉搬廢而爲直達，諸路鹽課之利，奪而歸權貨，糴本錢罷而爲羨餘，公私俱病矣。方時艱難，舊法未易卒復。欲且權宜救急，請令發運使副判官三員迭相往來，周而復始。其一在眞州，主江湖；其一在泗州，主淮浙；其一在京，主交納理欠。在泗州者循例奏計，皆從之。一日急召對，上曰：朕昔在東宮，聞卿淮南之政，今除卿開封尹，公皇恐固辭，迺以爲直龍圖閣，兼淮南荊湖制置發運副使。時京師已戒嚴，帥范瑁遣人清野，時行擄掠，公捕得數十人戮之。以聞，詔許公以便宜行事。今上以康王開大元帥府于河北，公以外路動息及所措置事，募壯士達奏于京師，復以京師平安。及大元帥府行移檄東南八路，以安人心，詔監守郡守勤王，公糾合義士，收集潰兵，期以入援。請元帥移軍曹濟，約諸道同進，詔復以金人議和，勤王之師勿輕舉，衆疑惑不前。公獨遣部將金汝翼由鹿邑至大康，力戰爲敵所獲，敵欲得李剛、吳敏、徐處仁、宗澤及蔡京、王黼、蔡靖、王安中等家屬，朝廷爲之遣使四出。公知非王命，執留不遣。二帝北狩，張邦昌僭位，邦昌遣人持書至廬州，問其家安否。公檄郡拘縻其家，又遣人以僞詔詣公止兵。公以聞，大元帥府復遣子澹請于大元帥，宜處分軍國事。來勤王憤怒之，兵帥諸將北渡河，出敵不意襲之，救二帝危急。若失機會，恐窺伺之徒內連外結，未易定也。元帥至南都，卽帝位，欲留公自近。公以二親在東南，乞補外，乃復以爲發運副使。邦昌以三公平章軍國事。

公乞致仕避之。論者謂公在宿州。嘗差宋良嗣者權鈴轄。不當奪職。與郡未幾。賞宿州守禦之勞。良嗣預焉。亦遷公一官。公辭曰。前日以爲非。則今日不當以爲是。時宰大怒。御史遂言公有不法事。按驗無一實。猶降三官。知襲慶府。丁開府憂。明年奪喪。知潭州。力辭不獲命。到官七日。會遣戍襄陽。衆憚行。夜半縱火殺人。公亟命傳呼列炬登城。飭持更者。一如無事時。于是賊所未至。按堵不動。督厲牙兵。斬首數百級。比明皆遁。急追襲降之。三日復遣戍。無一敢喘者。時建炎己酉也。其冬敵騎自鄧城南渡。掠武昌。入江西。州縣皆望風降。還抵長沙境上。或謂他州縣皆已下。敵鋒不可當。盍避諸公曰。是何言之不忠也。使向之諸郡有一二能爲國家守。敵其至此耶。旣而敵騎傳城檄公使降。公答書數責之。登城誓衆。激以忠義。將士無不殊死戰。雖殺傷相當。而外救不至。凡八日城破。公率衆入子城巷戰者二日。乃焚敵柵。奪門以出。軍于湘西。郡人咸從。公以忠義自奮。無一降者。敵退。公上章以失守自劾。詔奪職罷免。未幾朝廷治州縣之投降者。公之忠節始白。賜詔獎諭。復還職任。公乞持餘服。至于四五不許。時孔彥舟者。縱兵大掠西阻嶺。嶠不能前。鼓譟而下。公遣兵擊走之。有李冬至者。起兵于宜章。會將官吳錫提精兵數千。無所歸。公招致之。激勵討冬至。汧平之。有曹成者。自江北縱掠入湖南。欲踰嶺。公曰。若使此輩得逞。則湖嶺非王土矣。當隨以計破之。迺屯于衡之安仁。有兵才數千。遣人諭成。待以善意。給其糧。成遂巡不果進。公以事勢危急。請兵于朝。請援于鄰路者相繼也。皆不報。幾百餘日。賊率衆鼓譟直抵屯下。公以單騎入其軍。衆皆羅拜。公與約。毋得劫掠。皆聽命。擁公至道州。賊以公不便于己。復送公自營。公以討賊不效自劾。旣不報。且有

召命公力辭。復乞持餘服從之。服除。知廣州。海賊與郡吏交通。官府及兵將動息。輒先知之。公合胥首詰責之。能以實告。則已。不然。將不復生出獄矣。胥大恐。言其情。于是盡得盜姓名。及所囊橐。往來宿食處。是後盜發。輒得。嶺海肅然。未幾。以御史有言罷去。公遂乞致仕。繼丁永國憂。服除。一時善類交章論薦。詔落致仕。知江州。又改江東轉運使。且召對。公奏曰。昔漢高祖之取天下。其謀先定于漢中。蜀先主之復漢祚。其謀先定于荊野。陛下圖中興之業。而初無一定之論。是以九年而功未就。又曰。君子小人之進退。否泰安危所繫。今廟廊之上。乃有附逆之人。而欲弭外患難矣。上嘉獎再三。進祕閣修撰。時江東使者當饋餉。大將劉光州張俊軍。凡軍中追求之非法者。公隨事裁抑。會僞齊入寇。光世軍合淝。以乏糧爲詞。請退保公。晝夜倍道至合淝。光世引兵欲出。公直入城。按簿書。具以見在泉穀。與沿路綱運上聞。以大義責光世。光世乃不復退。進擊賊破之。然以此與光世不協。求去。詔移兩浙路。初公卜居臨江。名曰薌林。至是入覲。上親書薌林字賜之。進徽猷閣待制。爲都轉運使。戶部侍郎。公所論事益衆。一日進對。上顧問至移時。閣門以當進膳。欲奏而未敢。有攝起居郎者。遽出位彈奏。公退。卽待罪。又乞致仕。詔以爲無罪可待。而公請不已。除徽猷閣直學士。知平江府。上賜舟。親題曰汎宅。時王倫自敵中與其使者偕來。公上疏以爲禦戎之道。自古人主不憚屈己。與之和親。則有之。未聞首足易位者。宜卻而勿受。且乞致仕甚力。許之。仍賜詔獎諭。自是歸隱。凡十有五年。積俸錢三百萬。悉捐入郡學。爲養士藏書之費。自卜葬地。後事皆豫備。且自草遺奏。率人所難言者。享年六十有八。詔贈右正奉大夫。娶范氏。宗子博士。壻之女。累封安康郡太夫人。

男七人。洛右朝奉郎澹。左承議郎浯。右通直郎餘。早世。女七人。長適右承議郎劉長福。次適右從事郎吳謙。次適右宣教郎黃挾。次適承務郎陳延世。餘不育。孫男四人。士伯。士虎。皆將仕郎。次士彪。士叔。孫女六人。長適進士韓顥。次適右迪功郎劉荀。次適將仕郎章相。餘幼。公性至孝。承顏養志。必探其微。李頌人沒。乞回郊祀任子恩。加贈友愛諸弟。先奏諸姪官。然後及孫。置義莊。以贍宗族貧者。篤故舊。親名賢。與朋友交。盡言無隱。周人之急。不計其私。而自奉甚約。其見義必爲。如恐不及。置禍福于度外。識慮精遠。洞見物情。盤錯之會。談笑剖析。皆出人意表。興利除害。不計目前。爲政雖嚴。而本于仁恕。所至可紀甚多。此特著其大者。蓋自臨川王氏。以其一家之學。同天下。立法令。設爵祿。以誘之。天下之士。循誦習傳。以爲成說。後之用事者。持之益堅。士稍出意。欲自激昂。則摧沮擯斥。甚則有不可測之禍。故家遺老。雖有存者。世俗往往指笑以爲戒。風聲氣習。薰炙漸漬。大抵以委靡隨順爲俗。故利在閹寺。在權臣。在賊盜。皆從之。有能于此。卓然特立。更閱夷險。不爲利疚勢回。而屹然自拔于流俗之中者。豈非難哉。方閹寺用事。趨附者惟恐後。公以小官與之。辦曲直。不少屈。未幾變亂迭起。或乃甘心於污僞。他亦退縮奔竄。爲全軀保妻子計。公獨奮不量力。撓其鋒。蓋僅脫死如毛。釐者數矣。旣而大臣專權。以峻刑箝天下口。非曲意阿附。鮮有免者。公言一不合。見幾而作。超然物外。自適其適。于是人始服公爲不可及也。元城劉公安世。曾謂公必有立于世。文定胡公安國。謂公氣節忠鯁。心向國家。尊戴君父。徇公忘私。正今日扶持三綱之人也。由今觀之。二公之言。益信。銘曰。

顏跖之分。曰義與利孰敵。斯人學乃爲利。舉世靡靡。儉安苟活。不有君子。豈能自拔。公以英姿輔之。正論惟義所在。他無足問。方時多艱。馳騖其中。如水萬折。必歸于東。年五十餘。謝事而歸。惟介于石。故能見幾知之。固難行亦匪易。若公始終。蓋可無愧。我爲此詩。以示來裔。後有攷者。尙論其世。

左奉議郎汪公墓誌銘

公諱喬年。字房孺。信之上饒人。公自爲兒。嬉戲膝下時。已能順適親意。旣長。操行益篤。天性敏悟。又能刻苦于學。在崇寧大觀間。雖以習一經應試。而徧觀他經。及諸子歷代史記。往往浹洽。規摹古人。作爲詩騷。蓋不專于舉子之業。至舉子之文。亦自成一家也。會御史陳公師錫來居于信。公獨知所愛重。朝夕敬請。陳公爲公言前輩出處大節。學問文章本末甚悉。公益得以攷正焉。于是郡丞洪公芻監試進士。得公之文而大奇之。以爲非尋常舉子所及。恨攷官拘于尺度。僅能勿失而已。其贈行之言。以爲汪子之文。獨余知之。璆琳瓊琚如也。驂駟駟如也。設不長雄于二千人中。猶當霸于一經也。或乃指其瑕而捨其瑜。議其牝牡驪驥。而棄其千里何哉。然自是試輒不售。至紹興五年。始以特奏名進士對策。擢爲第一。歷池州建康府饒州教授。自左迪功郎用舉者再轉至左宣教郎。又以從國信使出疆。轉左奉議郎。他兵火之餘。庶事草創。時沿江猶未解嚴。戍兵往來。類多託宿于學。生徒解散。學官備員而已。先聖廟像摧剝。棟宇傾圯。公至。卽白于州而更新之。學故有邸舍。爲富民冒占者數年。至是皆攷究而簿正之。其他所經畫甚衆。廩庫充牣。養士至百人。實自公始。公平居雖食貧。而于貨錢出納。物價低昂。漫不訾省。至其當官。乃留意。

子細碎如此。其後二郡亦隨其窳隙補葺焉。不求新奇也。接納後來。訓誘不倦。四方游學無所歸者。病則臨視療治。死則任其後事。以爲常。其歸自饒。貧益甚。荒郊敝廬。藁藁塞徑。或飭粥不繼。而獨以書冊自娛。紹興二十有五年正月乙亥。終于家。年七十有六。公豈弟樂易。不以世俗細故蒂芥其中。于人無怨尤。雖有以惡聲至。不校也。臨事接物。一以誠信。未嘗逆設機械。喜賓客。每或斥服用爲食飲費。聞人之過。如不聞。得人一善。則稱道不容口。少以文字顯。晚以年德尊。而未嘗自居。退然如不足者。故雖耄老。而齒髮不衰。耳目聰明。亦其德性寬裕致然也。鄉里之士。方喜公之康彊。而不意其止此。莫不失聲歎息。或至流涕。有文集七十卷。曾祖諱惠。祖諱濟。考諱皓。贈右承事郎。妣陳氏。贈孺人。其配鄭氏。贈孺人。左宣教郎。東陸之女。男七人。曰大忠。某某。女二人。長適進士鄭鍵。次在室。諸孤將以是年月日葬公于開化鄉之橫山。奉公之治命以來。請銘。惟信之汪氏。皆唐末自徽來徙。分散旣廣。莫可攷也。公于某有宗黨。倍年之尊。而屈折輩行。與之爲友。臨絕之音。以銘見屬。某其何敢辭。銘曰。

嗚呼房孺。其德之裕。俛仰一世。無怨無惡。維心之亨。豈曰不遇。今其亡矣。誰或起之。有子七人。尙其似之。左朝散大夫直徽猷閣陳公墓誌銘

公陳氏諱璫。字國壽。建之建陽人。曾祖諱贈奉直大夫祖某。奉議郎。致仕。考賓。贈右朝請郎。妣江氏。太宜人。太宜人早寡。惟一子教之甚嚴。公亦自力于學。中建炎二年進士第。左從事郎。洪州觀察推官。未赴。權建之崇安縣丞。會金兵入。且渡江。諸將不能守。潰兵有入閩者。人情洶洶。縣令與諸佐官皆避之。居民亦

驚走公獨不動曰此官軍也當善待之既至犒勞供億率過其望帖然無敢譁又移文前路使儲峙以俟兵民舉安一路賴以無他事建陽弓手王延勝等嘯聚燒縣舍殺主簿官軍數不利使者專委公討捕公糾合民兵得千餘人迎戰于麻沙克之賊所擄掠子女數百悉訪還其家以功特授左承奉郎公初未歷任雖一時守領而遇事已能如此監湖州梅溪鎮通判建康府連帥故執政強明過人寮屬受成事惟謹公獨不苟從事有未安請問辯析詞順意篤帥每幡然從之公初不語人也大將張公以樞密使視師即建康治戰船欲以公提舉且曰事畢可轉六七官矣公以其間曲折所當議者非一而共事者皆難與語力辭不就張不樂數引他事相鑄譙公從容應答略不以介意既而張罷兵枋朝廷下有司攷覈其軍中財用主者以委公謂公必不遺餘力公平心處之不爲已甚張始歎服授福建建安路司辟差參議官未赴丁太宜人憂服除知饒州歲大旱穀賈翔踊民匱于食公精意禱祠竭力賑濟時州縣不敢言災異公獨盡以實聞所蠲弛租稅甚衆除廣南西路轉運判官尋知靜江府兼主管廣南西路經略安撫司公事靜江歲于屬縣科取秬米以供公庫又以逃亡租稅均之保伍公至始皆除之宿逋之在民者一不取而廩庫皆沛然有餘蓋公所以理財者有道矣非如世之以掊克取辦也召對除直祕閣知潭州兼主管荆湖南路安撫司公事未幾改知廣州方秦丞相當國事士人在謫籍者雖其親舊不敢相誰何傾險急進者或窺伺中傷以爲奇貨公在嶺外所調護流人甚厚監司郡守例獻羨餘亦有覬覦以避禍者公獨未嘗獻也其不爲時俗所移類如此既召對蓋將有所屬任公議論復不合廣州之除非美意也方待闕間

而秦丞相薨。詔以公知湖州。未至。改兩浙轉運副使。公雖苦足疾。而治事精明如平時。然以久廢朝謁。不自安。得請主管臺州崇道觀。進直徽猷閣。以寵之。尋起知饒州。已而疾益侵。再得請以歸。以紹興二十八年五月丁卯。終于家。年六十有二。積官至左朝散大夫。娶詹氏。翁氏。張氏。皆封宜人。五子。長照。右修職郎。英州真陽縣主簿。奔公喪。死于路。焯。右修職郎。成都府路鈐轄司幹辦公事。次爚。次炘。次熺。孫一人。坦。公姿貌魁碩。質性莊重。于吏事尤精敏。牒訴案牘。一覽卽得要領。至其細微委曲。皆洞見。吏不能欺。約束堅明。未嘗以卒伍輩持符至州縣。而事皆如期。其剖決逋滯。伸理冤結。戢姦革弊。所至皆可紀。故世卒以吏事稱公。然公守正持重。不以進退得失爲意。其見義必爲。爲必不可奪。使其進而立朝。豈苟然已哉。公之用于世。既不盡其才。而世之稱公者。亦不盡也。諸孤以三十年三月甲申。葬公于建陽之招賢里。鑑原某嘗通判靜江府事。亦時相所不樂者。公獨相知。照。焯。以公行狀來請銘。義不得辭也。銘曰。利不苟就。害不苟避。時難變化。一斷于義。隨所試用。到則有聲。曾不一日。立于朝廷。才難固然。知亦未易。我爲銘詩。以告史氏。

文定集卷二十二

誌銘

黃君藁誌

公諱某字循聖姓黃氏其先建州浦城人至公之曾祖始居姑蘇曾祖諱某承議郎累贈金紫光祿大夫妣信都郡夫人桑氏祖諱彥朝奉大夫贈朝請大夫妣宜人錢氏考諱策左宣教郎直祕閣妣孺人程氏公自幼礪落不凡直閣公以元符末上書論事繁名黨籍公自以黨人子不復應科舉朝夕親側所以奉養盡其歡且益得以用力于學審正其是父子間自爲知己靖康元年黨禁解公始出預薦書至貢部不耦遂棄去蓋自紹聖以來用事之臣變論是非無所不至太上皇帝既卽位首下詔書推明宣仁皇后功德崇奉隆祐皇后盡其愛敬民志定矣而異時權臣詭謀密計其本末曲折世往往不能知也初蔡京作相欲掩蔑元祐政事之善摘元祐日厯時政記中語言奏乞類此者悉焚毀公偶得其手書奏藁上之詔付史官京之在翰林也被召草制復元祐皇后位徽宗皇帝諭以哲宗悔悟之意及制出初不如所諭也京意蓋有在矣公又得其手書所進聖語副本上之且乞因此辨明誣謗以頒示天下會隆祐皇后遺詔出公論之益力太上感動詔有司討論合行典冊奏告天地宗廟直閣公聞之歎曰伸吾志者此子也紹興二年丁直閣公憂服除會楊么據湖湘累年丞相張公出視師以公偕行官軍遣人往賊所輒被害無

敢往者。公獨度賊勢窮蹙。自請行。賊自驚喜致恭。然意向猶豫。公徧見其黨。諭以朝廷好生之意。且賀其得爲平人。衆皆歡呼。賊首乃隨公出降。湖湘平。奏功授公昌州文學。未幾以母老乞歸養。公前後數上書。論朝廷恢復中原大計。忠憤激切。詞理條鬯。會車駕自建康還臨安。公以爲退守似安而實危。進戰似危而實安。已而金人廢劉豫。欲得和于我。公又以國家于敵。無復通好之理。使和議出于敵之誠心。猶不可聽。况其詐乎。疏各數千言。援據明白。反復詳盡。皆不報。以右迪功郎監潭州南嶽廟。丁母憂。服除。以右修職郎主紹興府山陰縣簿。未赴間。改淮西安撫司準備差遣。又以右文林郎爲淮西提刑司幹辦公事。未幾移病歸。以右宣議郎致仕。命未下。而公卽世矣。實紹興二十九年十二月九日也。享年五十有九。娶葛氏。二子曰。元振。曰元衡。皆業進士有聲。能世其家者也。

〔案〕此篇有誌無銘。誌文亦似未全。

戶部郎中總領彭公墓誌銘

公彭氏諱合。字子從。吉州廬陵人。世以孝弟仁厚稱于鄉里。至公而益著。以父致仕恩補官。初以右迪功郎主臨江軍清江縣簿。其臨事不苟。已有能名。丁母憂。服除。權虔州興國縣丞。以獲盜中率改右宣義郎。知虔之信豐縣。虔俗健于鬪訟。輕爲賊盜。信豐其甚者。累政鮮以理去。公強敏聰察。訟至立斷。皆得其情。民旣懋服。于是謹保伍之法。所條畫甚備。明示賞罰。行之以必。盜無所容。發亦輒得。則又建縣學。置弟子員。稍旌異之。以勸其從。風俗一變。監司帥守交章稱薦。詔增秩一等。且召對。賜五品服。添差通判虔州。察

姦革弊。知無不爲。尋主管台州崇道觀。知臨江軍。知永州。皆以政績聞。會詔近臣舉可爲監司。有以公言者。除提點廣西刑獄。又移湖南。其所停疑。仲枉決遣。逋滯甚衆。除尙書戶部郎中。總領湖廣江西京西財賦。初止武昌軍。至是。荆南九江皆屯重兵。仰給益廣。公計盈虛。信期會。不擾而辦。且請蠲除逋欠。凡百萬。旣得疾。凡三上章致仕。不報。以紹興三十一年二月六日卒于官。年六十有九。積官至右朝請大夫。曾祖諱仲素。祖諱士忠。贈朝請郎。父諱衍。任朝奉郎。贈正議大夫。母蕭氏。贈碩人。娶劉氏。李氏。曾氏。黃氏。封宜人。皆先公卒。男四人。長楚老。右迪功郎。先卒。次商老。右迪功郎。監潭州南嶽廟。次周老。右修職郎。次漢老。右迪功郎。特就差宜州思立寨主簿。女六人。長適進士李孝敏。次適右從事郎。撫州司理參軍。蕭達伯。次適右儒林郎。知靜江府興安縣事。曾敏恭。次適右迪功郎。監潭州南嶽廟。孫積明。餘在室。孫男八人。女六人。諸孤將以十月辛酉葬公于廬陵縣青原山楊桐嶺之原。書來請銘。應辰與公游舊矣。知公爲詳。不得而辭也。銘曰。

凡世之才。因事乃試。盤根錯節。始見利器。就其所能。亦或有異。以刑立威。以刻興利。功無幾何。害則不啻。有如子從。所至辦治。何以止盜。開其善意。何以理財。有取有施。彼計其功。我度于義。世方用之。公則盡瘁。歸安此丘。其尙無愧。

延平李先生墓誌銘

先生諱侗。字愿中。姓李氏。南劍州劍浦人。曾祖幹。屯田郎中。致仕。贈金紫光祿大夫。妣清源郡太夫人。朱

氏祖纁、朝散大夫、贈中奉大夫、妣永嘉郡太君、胡氏、咸寧郡太君、朱氏、父渙、朝奉郎、贈右朝議大夫、妣太恭人、饒氏、先生幼警悟、既冠游鄉校、有聲已、而聞郡人羅仲素先生、得河洛之學于龜山楊文靖公之門、遂往學焉、受春秋、中庸、語、孟之說、不事科舉、屏居山田、結茅水竹之間、自適者餘四十年、其始學也、默坐澄心、以驗夫喜怒哀樂未發之前氣象爲何如、若是者、蓋久之、而知天下之大本、真有在乎是也、蓋天下之理、無不由是而出、既得其本、則凡出于此者、雖品節萬殊、曲折萬變、莫不該攝洞貫、以次融釋、各有條理、如川流脈絡之不可亂、大而天地之所以高厚、細而品彙之所以化育、以至經訓之微言、日用之小物、折之于此、無一不得其衷焉、由是操存益固、涵養益熟、汎應曲酬、發必中節、其事親從兄、有人所難能者、閨門內外、怡愉肅穆、若無人聲、而衆事自理、與族姻舊故、恩意篤厚、久而不忘、鄉黨愛敬、悍暴化服、其接後學、答問不倦、隨其氣質誘之、各不同、而要以反身自得、而可以入于聖賢之域、嘗謂讀書者、當知其言莫非吾事、而卽吾身以求之、則凡聖賢所至、而吾所未至者、皆可勉而至矣、若直以文字求之、悅其詞義、以資誦說、其不爲玩物喪志也、幾希、以故未嘗爲講解文字、而其辯析精微、尤謹于毫釐之間、以爲千里之謬、必自此始、蓋先生資稟勁特、氣節高邁、而充養粹厚、無復圭角、精純之氣、達于面目、色溫言厲、神定氣和、語默動靜、端詳閒泰、自然之中、若有成法、異端之學、無所入于其中、然一聞其說、則知其詖淫邪遁之所以然者、雖超然遠引、若無意于當世、而憂時論事、感激動人、其語治道、必以明天理、正人心、崇節義、厲廉恥爲先、本末備具、可舉而行、非特崇空言而已、娶同郡吳氏、子男三人、友直、左修職郎、信州鉛山縣

尉信甫左修職郎、建寧府建安縣主簿、友文、未仕、女一人、早亡、孫男四人、孫女八人、皆幼、先生以隆興元年十月壬申卒于福唐府治之館舍、年七十有一、其門人左迪功郎、武學博士、朱熹、元晦、狀先生之行如此、元晦之爲人也、審于擇善、嚴于衛道、遺佚貧困、而不以外物易其所守之錙銖、其師事先生久、益不懈、以爲每一見、則所聞必益超絕、該其上達不已、日新如此也、某守福唐、聞先生之言、行于元晦爲詳、他日移書屈致、先生不余鄙、惠然肯臨、竊庶幾聞所未聞焉、至之日、方坐語、忽疾作、頃之已不救矣、其孤護喪以歸、將以二年八月庚申葬于所居山之左、而以銘見屬、某于先生雖不獲從容扣請、以畢其所欲見之志、而其慕向之誠、非苟然者、且元晦之賢、某所畏也、銘曰：

學以爲己、已則安在、嗟世之人、以外爲內、挾策讀書、無異博塞、先生之學、有原有委、端居靜慮、以究天理、是中澹然、塵垢不止、真積力久、道乃在我、大本既立、施無不可、世莫之知、老于布衣、獨使一鄉、化爲善良、我爲銘詩、以俟君子、有欲求之、其攷諸此。

吏部郎樊茂實墓誌銘

茂實樊氏、名光遠、臨安錢塘人、曾祖文、妣婁氏、祖用安、妣王氏、考周、贈右朝請郎、妣席氏、贈安人、累世皆隱德、不仕、至茂實始以儒學顯、初臨川王荆公著三經義字說、以同天下之學、舉世誦習如六經然、范陽張先生以爲學者貴于自得而躬行、可以爲天下國家用也、今守其穿鑿附會之說、而修身治人、析爲兩途、則何貴于學矣、先生以此數見黜于當時之有司、貧至飡粥不給、茂實獨師事之、甚謹、旣冠、徒步就太

學試以書義對。是時文體亦稍變矣。而茂實獨直指王氏之失。力排之。切中其要。攷官奇之。置高等。是後士人乃益得自致于學。紹興五年。茂實試春官爲第一。遂中進士第。調秀州海鹽縣主簿。改常州教授。未行。召見。除祕書省正字。秦丞相用事。敵人來歸河南地。茂實因輪對。力言所當思患而豫防之者。秦丞相始不悅。未幾。敵人叛盟。前日異論者益見忌。乃出茂實爲閬州教授。茂實以大母年高。而迎養非便。得請監潭州南嶽廟。丁大母憂。服除。歷廬州。明州。教授。秦丞相既薨。詔除茂實祕書丞。方秦丞相時。凡以疑忌得罪者。往往累赦不復。又奪其所當得恩澤。茂實得召見言之。太上嘉納。詔還恩澤有差。而茂實爲監察御史。茂實在臺中。所裨欻甚多。未幾爲工部員外郎。得請知興化軍。茂實初未嘗歷吏事。興化俗號難治。生謗起訟。長吏鮮以理去。茂實曰。吾以誠待人。他不恤也。既至。簡節目。通下情。先教化。而後刑罰。獄訟日衰。少遷提點福建路刑獄。茂實于刑獄尤盡心。凡所以要束防察甚備。閩多刦盜。類與州縣吏相表裏。不卽獲。間有在官者。吏輒併財主繫之。以是無敢愬者。茂實許其徑詣司自言。而嚴追捕勘鞫之限。盜始有所畏。建州兩獄充斥。茂實至。釋囚繫一百四十有三人。朝廷爲罷免長吏。其他所平反全活甚衆。徙知嚴州。適諸軍遣人募兵。皆誘略平民。所至騷然。人不敢入市。茂實具奏其狀。乃詔諸軍皆立額。有闕則取旨下諸州寄招。其患遂息。嚴每歲買御爐炭。其實皆科取于民。茂實奏罷之。提點浙東路刑獄。高麗將入貢。茂實極言其甚不便者六事于朝。詔卽止之。今上卽位。召爲吏部郎。茂實以足疾辭。尋除福建路轉運副使。不行。得請主管台州崇道觀。以隆興二年七月卒。年六十有三。茂實氣貌嚴重。語言確訥。不知者以爲

簡也。自得罪秦丞相流落。幾二十年入朝。纔歲餘。輒出。蓋有不悅者。旣而諸公貴人議論士大夫之當召用者。未嘗不以茂實爲稱首。茂實初無求于人也。是以久在外吏部之命。蓋將用之。而茂實不能造朝。遂以不起。識與不識。皆爲之流涕也。然茂實強學力行。更閱世變。操履如一。顧念平生無一可愧恨者。其志得矣。他何言哉。有尙書解三卷。禮記講義二卷。梅憲雜著十卷。藏于家。娶陳氏。算學博士從道之女。封安人。子男三人。擴。左修職郎。抑。左迪功郎。饒。州浮梁縣主簿。擢將仕郎。女一人。許嫁將仕郎陸邈。孫男七人。致堯。拱舜。贊禹。暨湯。憲武。保成。規宣。孫女一人。諸孤將以其年十月甲子。葬于錢塘縣安溪鳳泉山之原。而移書屬某爲銘。某與茂實皆范陽張先生之門人。又同年進士。又同爲祕書省正字。旣而還朝。以至去國。亦適相先後。道義之契。非他人之比者。銘其可辭。銘曰。

沙縣羅宗約墓誌銘

宗約羅氏。諱博文。曾祖安中。贈中奉大夫。妣恭人鄧氏。祖畸。朝請郎。右文殿修撰。妣張氏。陳氏。皆宜人。父彥溫。右從事郎。知建寧府甌寧縣事。贈右承議郎。妣鄧氏。黃氏。皆贈太孺人。其先豫章人。唐長慶中有爲南劍州沙縣尉者。因家焉。五世孫覺。始舉進士。再世而右文公以懿文清德。顯重于世。至宗約。復以道學行誼。克世其家焉。宗約生有異質。家人試以碎檠。一無所顧。獨匍匐取書冊之言性理者。展玩久之。右文公歎異。爲文以記其事。年十餘。遭甌寧府君喪。哀毀如成人。治喪葬必誠必信。用右文公奏補官。授右迪

功郎福州司戶參軍。臨事不苟。無鉅細皆有條理。再調靜江府觀察大使。桂管爲嶺徼以西一都會。府事既已叢劇。而連帥監司亦多委以事。宗約皆從容治辦。時秦氏用事。士大夫以忤意竄斥。繫踵南來。宗約悉善遇之。至或鬻衣以濟其乏。改右宣義郎。知贛州瑞金縣事。始至歲歉。宗約先事儲積。旣而發廩賑贍。事皆躬臨之。其至誠惻怛。雖一主于惠愛。無所惜。而措置纖密精明。人亦不能有以欺也。縣故多盜。宗約設方略。得首惡數人。寘諸法。境內帖然。會故丞相魏國張忠獻公都督江淮。請以爲幹辦公事。其募兵和糴。皆不擾而濟。張公再入相。賓客例出幕府。以宗約知和州。未赴。而四川制置使奏辟爲參議官。宗約詳審精密。每論事反覆殫盡。歸于至當而後已。嘗至興州。勞將士。宣撫使以禮致遺。爲錢三百萬。宗約不欲受。而難于辭。還次漢州。州方治貢院。以五十萬助之。餘悉輸制置司公帑。橫渠張夫子之家。避地流落。貧不自振。宗約訪得之。爲言于帥。延至府學。蜀士知所勸焉。士之遊宦蜀土。貧不能歸者。宗約出捐俸錢。周之。賴以濟者甚衆。累遷承議郎。秩滿。得請主管台州崇道觀。行至嘉州。得疾。其同行來問者。宗約雖疾病。而拱手端坐。無惰容。蓋其持敬如此。一日忽曰。吾將逝矣。然幸大事已竟。可無憾。遂不起。乾道四年四月甲辰也。享年五十有三。其同行聚而哭之。解其裝以理喪事。則獨有書數千卷。餘金僅足以歸其柩而已。相與嘆嗟。以爲不可及。十有二月壬寅。塋于沙縣巖地祖塋之旁。宗約娶陳氏。了齋先生之兄孫女也。子男二人。曰問。曰闢。孫男八人。女七人。皆幼。宗約資稟和粹。沈靜寡欲。其處己待人。一以誠敬。平居怡愉。人莫見其喜愠之色。聞人之善。稱慕如不及。至其有過。則常若有所隱避。而不忍言也。視人患難困乏。如切

其身年幾三十。既喪耦。卽屏遠聲色。一榻蕭然。惟樂善不倦。如嗜欲。聞天下之士。有一言一行之幾乎道。至或千里求之。其同郡李愿中。受業于龜山先生。楊文靖公。宗約從之遊。多所發明。于是知吾道之尊。其自信益堅矣。然宗約之爲人。雖篤意學問。而不爲文詞。雖力行善事。而不徼名譽。雖愛衆親仁。而非以爲取悅也。故世之知宗約者。亦鮮矣。其孤以樞密院編修。朱熹。元晦。所爲行狀。以來請銘。余與元晦蓋皆知宗約者。銘曰。

汲汲其求。兢兢其持。保此無憾。全而歸之。

文定集卷二十三

誌銘

顯謨閣學士王公墓誌銘

公諱師心字與道世爲婺州金華人曾祖惟堯故不仕祖本故贈宣教郎考登承議郎贈特進妣陳氏太原郡夫人公幼敏悟強記而靜重如成人未冠游鄉校數試藝有聲登政和八年進士第授迪功郎海州沭陽縣尉時承平久郡縣無備河北劇賊宋江者肆行莫之禦旣轉掠京東徑趨沭陽公獨引兵要擊于境上敗之賊遁去詔改承奉郎監信州泃口排岸丁外內艱服除紹興元年知福州長溪縣政事詳明民便安之盜起建寧官軍由永嘉浮海入閩討之道長溪供億百出倉卒間皆不擾而辦宣撫使賢之併以治狀聞除太府寺丞尋例罷職事官之待闕者除幹辦諸司審計司行大理寺丞九年金人以侵疆來歸詔簽書樞密院事之臣往使陝西宣諭德意辟公幹辦公事時多謂和好可久公贊畫之際力陳敵必渝盟宜蚤爲備初大食國遣滿亞里入貢而廣東市舶司例計置回賜官吏並緣侵刻訟久不決詔公同御史往廣州卽訊獄乃竟除將作少監遷樞密院檢詳諸房文字右司左司郎中十三年郊祀以爲提點一行事務遷權工部侍郎充大金賀生辰使還未幾出知袁州公勤于吏事動有繩墨州素匱乏公撙節浮濫檢柅欺隱久之廩庫盈溢方秦丞相用事監司郡守類獻羨餘以希進或謂公盍獻諸公笑不答則以

貸貧民之逋租者。猶沛然有餘積也。尋提舉江州太平興國宮。二十三年。浙東大旱。衢州飢民嘯聚。雖頗捕獲。猶未定。則起公知州事。公鎮以安靜。民復安堵如故。時士大夫往往以告訐爲功。通判州事汪召錫。倚撫宗室。令衿語言。以爲謗訕。公聞而勸止之。不聽。令衿謫居汀州。且置獄。通判迫其行人。無敢過問者。公獨遣人慰安。而陰調護之。除知瀘州。中途改知洪州。充江南西路安撫使。轉運判官張常先。箋注前帥張宗元所與張丞相詩。言于朝。欲并中之。獄辭所連。逮百餘家。公隨事救底。賴以免者爲多。會秦丞相薨。事亦熄。上躬攬權綱。一新政事。凡昔之無良。其挾持附離以逞者。次第譴斥。于是公獨以不倚見知。除數文閣待制。知荆南府。荆湖北路安撫使。湖南凋敝久。流逋未復。公悉力拊摩。戶口日增。奏言湖南上流重地。而兵力單弱。頃年茶商弄兵。一道騷然。乞分鄂渚重兵留屯。以示形勢。從之。召爲戶部侍郎。上勞問甚渥。且曰。卿以不附秦檜。故去國久。朕知卿未嘗忘也。公因奏。宜塞倖門。開言路。上語及國用。公謂生財不如節用。所條陳甚悉。又言。鄂渚戍兵。市馬北境。宜禁止之。以塞邊釁。鼎澧歸峽產茶。民私販入北境。利數倍。自知熬法。不復顧。藉因自棄爲盜。由引錢太重。貧不能輸。故抵此。乞別創憑由。輕立引價。既開其衣食之門。民必悔過改業。庶幾化誘愚民。消弭羣盜。上然之。遷給事中。兼詳定一司敕令。兼侍讀。遷權吏部尙書。進讀三朝寶訓終篇。公奏。祖宗創業垂統。所以長慮卻顧。爲子孫萬世計。甚備。熙寧大臣私意改作。流毒至今。不可不監。又奏。帝王之于史。其要在于觀得失。究治亂。今進讀漢書。願摘切于治體者讀之。詔可。公從容進退。所以致盡規之義者。前後非一。懇切詳盡。上皆嘉納焉。二十八年。浙東水災。上憂之。以公爲

顯謨閣直學士知紹興府事兼浙東安撫使既至詢究疾苦寬通責賑乏絕民以不流亡顯仁皇后敢宮事畢進顯謨閣學士時有獻議者持陰陽家說欲于敢宮舊禁之外廣立四隅以二十里爲禁域其間墳墓當徙者殆且千數公具奏言其不便詔遣御史按驗獲免者七百六十有奇薦獻之物舊取于民公謂聖孝通于神明薦獻極其誠敬豈宜使民勞費請以上供錢給其直從之和買繒絹以貨產爲多寡之差而縣各不同會稽偏重尤甚公奏請捐之後亦略如公言三十年知福州充福建路安撫使時敵有渝盟入塞意道路洶洶公早夜憂念至忘寢食條上三事一曰求人材謂任賢使能乃自治之要願委宿望實才以籌邊二曰通下情謂建炎維揚之難起于臣下壅蔽敵壓境而不知今當以爲戒三曰擇將帥謂朝廷宿將軍中新進不爲無人願加簡拔復移書執政以蜀遠緩急不能相應請增重帥臣之權使得以使宜從事又請推行州縣巡社法以防盜賊朝廷悉施行之汀州鬻鹽峻暴民驚擾嘯聚州輒遣兵捕戮復疑平民與鬻通械繫之欲論以重辟錄事參軍劉師尹爭不能得致仕去公移文釋其囚薦師尹于朝于是州之守貳皆坐罷而師尹復仕今上興隆元年提舉江州太平興國宮二年知湖州時水旱之餘疾疫太作道殣相屬公旣爲粥以食餓者又遣僚屬勸分多所全活乾道元年提舉江州太平興國宮再上章告老乃進左朝奉大夫致仕五年十有二月戊戌薨于里第年七十有三詔贈特進六年十有一月甲申葬于金華惠日鄉常樂寺之東原公娶曹氏封淑人六子渙右通直郎前權通判寧國府事洸右宣教郎前福建路提舉市舶司幹辦公事洸右承事郎新兩浙西路提點刑獄司幹辦公事出後公之長兄師醇

注、右迪功郎、新監行在太平惠民局、淑先亡、汾、右承務郎、三女、適仕族、孫男七人、柄、右承務郎、楷、杞、棣、梓、樾、朴、孫女十二人、曾孫男一人、公敦厚寬裕、詞氣穆然、不見喜愠、遇事精詳、必審其可而後發、不爲表襮、以求赫赫、拊兄之孫、如己子、族女之貧不能行者、皆使之有歸、雖自奉養儉薄、而親舊困乏、皆周之、久益不厭、旣退居、自號適翁、所著詩文章奏藏于家、自公仕宦五十餘年間、世之變故多矣、士方隨時炎涼、而爲之俯仰、竭其巧力、以趨勢射利、其他一切不暇顧恤也、公更閱夷險、出入中外、恬靜凝重、雅有常德、表裏相副、終始如一、而從容進退、自適其適、康寧壽考、鬱爲宿望、洪範所謂福者、殆無憾焉、觀公之本末、其念慮操履、所以感應召致、夫豈偶然者哉、銘曰、

恂恂王公、率履由衷、不矯爲異、不阿爲同、在昔柄臣、欲人同己、利誘威脅、翕然風靡、時方掎克、爭進羨餘、公散其積、代民通租、時方告訐、人莫自堅、公獨哀矜、勸以無然、皇明獨斷、屏除羣邪、公以不倚、帝庸褒嘉、國計之重、爾其開闡、朕命之嚴、爾其出納、乃侍經席、乃長天官、乃眷大邦、于蕃于宣、寒暑貿遷、誰能不移、中外出入、誰能具宜、公惟一意、秉此常德、更閱事變、其饒不忒、進退有裕、壽考且寧、歸安斯丘、始終哀榮、天運與善、人或疑之、視履考祥、其觀此詩、

龍圖閣學士王公墓誌銘

公諱十朋、字龜齡、姓王氏、溫州樂清人、曾祖信、祖格、父輔、父以公貴、贈左朝散郎、母萬氏、贈碩人、其先自錢塘徙、至朝散公、始業儒、有聲、公少穎悟、強記博覽、爲文頃刻數千言、事親盡孝、其居鄉進止、取予、必以

義後學師尊之。既入太學，多士皆推敬焉。太上皇帝躬攬權綱，更新政事。紹興二十七年，策進士于廷，詔對策中有指陳時事、鏗亮切直者，並置上列，無失忠讜。無尙諂諛，稱朕取士之意。既而攷官以公所對進，上臨定其文，以爲經學淹通，議論純正，可第一。及唱名，則公也。士論翕然稱愜。詔益嚴銷金鋪翠之禁，且以交趾所貢翠羽焚于通衢，實自公發之。授左承事郎，簽書建康軍節度判官廳公事。又詔王十朋係朕親擢第一人，欲試以民事，尙待遠缺，可特添差紹興府簽判，秩滿除祕省校書郎。尋兼建王府小學教授。時北人且背盟，朝廷疑之，猶未敢誦言爲備。公因輪對，力陳其不可無備者。且曰：禦戎之策，莫急于用人。用人之要，莫先于人望。今若內若外，士大夫軍民咸謂有天資忠義、才兼文武，可爲將相者，有長于用兵、士卒樂爲用、可爲大帥者，或實散地，或守遠郡，願陛下起而用之，可以作士氣、寢敵謀。又言：三衙管軍或久而不代，兵柄在手，利權財賂又皆入其門，且其官至三公樞密，所以節制諸將者，乃班其下，倒置如此，其能節制之乎？併及諸軍承受皇城邏卒之弊，其他指陳，率人所難言者。公之將有言也，人皆危之，而上特開納焉。既而罷諸軍承受，邏卒亦加戢，更定樞密與管軍班次，管軍亦引去，邊備益嚴。舊人相繼復用，自昔人臣論一事，或章十數上，或合衆力爭，不能回，公以一言悟意，而事皆次第罷行。于是天下仰上之聰明大度，虛懷從諫，非徒優容之而已。然大臣有不樂者，公亦數求去。除著作佐郎，罷其兼職。公以求去得遷，力辭不許。久之，除大宗正丞，仍待次。尋得請主管台州崇道觀。今上卽位，除知嚴州。未赴間，召對，公奏言：太上皇帝非耄期倦勤之時，而以天下授之陛下，賢于堯舜遠矣。陛下所以仰副太上付託者，當何

如舜重華協于帝。然八元八愷。堯未及舉。而舜舉之。四凶堯未及去。而舜去之。今社稷之大安危。民生之大休戚。人材之大進退。朝廷之大刑賞。其所當行者。宜舜若之。所以協于堯而行之。以彰太上知子之明。以盡陛下繼述之道。又言。今和戎與戰守之議未決。臣謂或戰或守。當相時進退。而和決不可議也。又言。右相虛位。天下拭目觀陛下此舉。必諸大夫國人皆曰賢。然後用之可也。不可非其人以失天下望。除司封員外郎兼國史院編修官。又兼崇政殿說書。除國子司業。諸生固已迎服矣。而公于學校事。其細微曲折。皆粲然前知。所舉措無不當人心者。會詔百官言事。公上疏。以爲百官進退者。大臣之職。論思獻納者。侍從之職。正朝廷紀綱者。臺諫之職。今居其位者。往往不舉其職。宜有以董正之。雖然。此特人臣之職也。而人主有大職事。曰任賢。曰納諫。曰賞罰。其言反覆詳盡。切于時務。上覽而嘉之。卽召公與工部侍郎張闡對便殿。從容論天下事。甚衆。請退。復留者再。賜坐。賜酒。又賜御書。隆興元年四月。除起居舍人。改兼侍講。公與左史同奏史職之廢壞者。其一曰。起居注錄本進呈。非古。欲勿進。其二曰。雖侍立而在殿東南隅。未嘗聞天子德音。如二府自有時政記。其餘臣僚登對。欲許令史官侍立。其三曰。後殿侍立。而前殿則否。于義無據。欲前殿侍立。其四曰。直前奏事。欲不必豫牒閣門。及候班次。皆從之。越月。除侍御中。公素以剛毅正直稱天下。至是人皆曰真御史矣。公益自任。以當世之重大。抵以定國論。正人心爲本。而去其害治者。不屑屑于細故也。江淮都督府出師進取宿州。敵悉衆來爭。我師退守淮。都督張公浚上表自劾。公奏曰。臣自總角在草茅間。聞強敵入中國。痛心疾首。義不戴天。臣素不識張浚。聞其天姿忠義。誓不與敵俱。

生實敬慕之。頃以館職輪對，首言敵情不測，乞用浚等。既而敵果大入，太上皇帝親征，遣浚知建康府。陛下卽位，因以江淮都督之任委之。天下皆以爲當。臣去冬被召至闕，前後進對，皆以爲恢復大計。仰贊聖斷，又乞陛下勿貳以濟大業。浚遣二將取靈璧、虹縣、宿州，降三大將。一月三捷，議者皆服。陛下任浚爲難，及王師不利，橫議蠱起。臣嘗奏陛下用兵爲祖宗陵寢而舉，爲二百年境土而舉，爲中原弔民伐罪而舉，與古帝王好大喜功，開邊生事不同。投機而進，知難而退，益當內修政事，俟時而動。陛下剛明果斷，規模固已素定，然異論紛紛，不肯置浚。今浚既待罪，臣豈可尙居風憲之職？欲望正臣妄言之罪，特加竄殛，詔以公權吏部侍郎，辭不拜。乃以集英殿修撰知饒州。乾道元年七月，移知夔州。尋除敷文閣待制。三年七月，移知湖州。未幾，得請，提舉江州太平興國宮。才數月起知泉州，進直學士。又移知台州。公以病力辭，且乞致仕。乃復提舉太平興國宮。七年三月，除太子詹事。召旨敦趣，公力疾造朝。上特御選德殿，而公足弱不能趨，召給扶，減拜，且賜坐。又詔權免朝參。又遣使以告，及金帶就賜。公三上章乞致仕。乃詔以龍圖閣學士致仕。命下而公薨矣。實七月丙子也。享年六十。上聞嗟悼，賻卹有加。令兩浙路轉運司給葬事。公積階至左朝奉郎，封樂清縣開國男。至是贈左朝散大夫，遺戒喪事毋得用佛老教。諸孤行之，以十有二月丙午葬。公于縣之左原白阡，頌人賈氏有賢行。先公二年卒。至是合祔焉。男三人，聞詩、聞禮，皆太學生。孟丙早卒。公兩遇郊祀恩，皆奏其弟。故二子皆未仕。女二人，長嫁進士錢萬全，次許嫁賈梓。孫男四人，公立朝議論出處大節，既如此矣。初，公以文學先天下，人謂其于吏事未必數數然也。而自爲郡佐，遇事不苟。

民有訟久不決。多走諸司。乞委公。雖文書填委。公一一繙閱。不以付吏。審核情僞。參用經律。所與奪。人皆厭伏。其治郡。旣以廉潔公正率其下。間有爲不善者。則反復告戒。誠意篤至。人亦有恥。故未嘗按吏。爲文勸導百姓。以遷善遠罪之意。有爭訟。卽曉以義理。多退聽者。故鞭扑罕用。事至立斷。其甚不得已。乃推鞠。亦不淹繫。故獄屢空。未嘗遣官吏至縣。而人素信服。事亦舉。利有可以予民者。予之。輸租使自操。概而用度有節。故財亦足。月率兩詣學宮。延見諸生。從容誨誘。且以詢究郡政。饒久旱。公下車卽雨。湖久雨。傷稼。公入境卽霽。每罷郡。士民涕泣遮擁。不容去。或借留于部使者。旣不得。則奔走道路。或越境不忍別者。泉人聞公喪。會哭于開元僧舍。又立祠堂以事之。近世爲政得人心。未有如公比者。公有梅溪前後集五十卷。尙書春秋論語孟子講義。皆指授學者。未成書也。公于文專尙理致。不爲浮虛靡麗之詞。其論事章疏。意之所至。展發傾盡。無所回隱。尤條鬯明白。蓋自漢氏尊用儒術。而士或飾詐。或阿諛取容。至于守節死義。能爲國重。則未必以儒名者。世遂以儒相靳。若公之學問粹然。一出于正。謹守而力行之。義之所在。疾趨徑前。未嘗以利害毫髮顧避。更閱夷險。特立不回。施于政事。左右具宜。信乎其有本如是也。嗚呼。此真所謂儒者耶。銘曰。

漢廷用儒。黯獨戇樸。淮南憚之。謀不敢作。謂公孫輩。發蒙振落。儒豈不用。其效奚若。孰知其故。鼠腊非璞。公之節義。視黯無忤。屹然立朝。作世郭郭。正色凜凜。危言諤諤。招之不前。麾之不卻。猛虎在山。衛及藜藿。出守四郡。治行皆卓。問胡爲然。非智之鑿。聖有謨訓。守約施博。惟其躬行。粹美無駁。道固如是。不由外樂。

于彼汲直如玉而琢。我爲銘詩以表儒學。人雖云亡。尙有渠驥。

柴君墓誌銘

左迪功郎復州州學教授柴端義。以書抵余曰。端義不天生。四月而孤。叔父實長養教誨之。今叔父死矣。欲報之德。昊天罔極。謹狀叔父行實。授諸執事者。惟先生幸而銘之。庶幾叔父雖死而不朽也。余于是取其言次序之。君諱淵。字益深。其先自衢之江山。徙信之永豐。曾祖觀國。父震。皆不仕。君事親以孝聞。撫育孤姪。與其子無間。閨門之內。和樂而肅靜。鄉人亦愛敬之。連遭三親喪。足不入私室。哭泣幾失明。蓋君所從遊。多一時名儒。講究經旨。以躬行爲本。故其行如此。既去喪。年踰四十。卽不復應進士舉。乾道八年二月甲子卒。年五十有五。娶徐氏。男端禮。端善。端智。長女適陳舜鄰。次適黃仁聞。黃氏者先卒。孫男女二人。諸孤以九年十二月庚申葬君于永豐之宅山。銘曰。

觀端義之于叔父。知君之子其兄子也。又知君之事親孝。故如此也。學而能行。夫又奚病。雖曰不仕。是亦爲政。

樞密院計議錢君嬪夫人呂氏墓誌銘

婦人德止于柔順。職止于饋祀。爲善作儀。則以爲戒。昔之表著內德。形于歌詠。聖人次之以首國風。不過曰能自防。能循法度。能不失職而已。至于言節烈志。往往多出于一時之不幸。不獲已而有見于外。雖非人情之可願。而世之君子必且稱道而特書之。夫以死生之變。交爭于前。陵遽顛沛。乃能審夫所惡。有甚

于死而患有所不辟。此烈丈夫之所難。而一婦人或能之。則夫君子之所以稱道而特書之者。豈獨爲婦道之勸而已哉。以余所聞。若夫人呂氏。其不幸而類此者歟。靖康間。戎事起。所至艱梗。夫人偕其家避地來南。屬渡漢沔。而潰兵有以譏禁爲名。因而鹵掠其間。無所不至者。夫人猝遇之。懼不免焉。自投于水。以誓義不污賊。賊相顧駭愕。因解去。旁舟亦賴以全。相與感夫人之義。畢力圖救。竟以得活。夫可幸以不死。而能必死。白處以必死。而未必死。所爲雖失其身。而有不顧者。以生之可求也。而死生果不可以避就。其自爲計亦惑矣。況舍生取義。不問其何如者耶。觀夫人之事。愚者足以辨惑。懦者足以有立志矣。夫人其先東萊人。至高祖文靖公。三相仁宗。始賜第京師。曾祖諱公著。以司空平章軍國事。祖諱希純。嘗任中書舍人。追復寶文閣待制。父諱聰。問右朝請大夫。直祕閣。夫人十有八而嫁。爲右朝奉郎錢受之之妻。呂氏仍世相家。而錢呂世嫺也。夫人不以貴與故自挾。所以承上接下惟謹。既而天下未定。轉徙道路數千里。崎嶇山谷間。人不堪其憂。錢君流落于下位。嘗一爲樞密院計議官。不旬歲而罷。自是閒居。且十年。生理日落。而夫人躬服儉勤。經紀家事。無不自得之色。觀其所以處生死者如此。則貧富通塞之際。固其所優者歟。封至安人。以紹興十八年三月二日卒于袁州。享年四十九。男三人。曰箴。右迪功郎。曰某。曰藏。女一人。孫男曰少。以其年四月九日葬于袁之宜春縣湖崗里。計議君狀夫人行事。而屬銘于余。余讀之而歎曰。此夫世之君子所爲稱道而特書之者。況余與計議君交游之舊。而又以見屬者乎。銘曰。

呂氏之盛。實始文靖。典型之遺。女有卓行。見危靡他。處約何病。其死有義。其生有命。曷觀于斯。惟命之聽。

夫人汪氏墓誌銘

夫人吾姊也。姓汪氏。信州玉山人。父諱某。贈通議大夫。母魯氏。追封淑人。夫人年十有九。嫁同縣程昂。躬儉服。勤人所難堪。而夫人安之。性質直。未嘗僞色。辭以欺人也。蓋嘗曰。吾老且衰。欲致家事而自佚矣。人亦以爲宜。饗其報。皆未及。而以乾道六年九月己丑卒。年六十有三。子男三人。長克勤。次克和。蚤卒。次克成。孫男八人。女三人。其孤將以七年十有二月壬寅。葬夫人于玉山之塘田社。來請銘。嗚呼。某哭吾兄甫期月。而又哭吾姊也。孑然此身。雖幸而僅存。亦何聊哉。銘曰。

其艱其勤。以終其身。咨爾後人。尙能顯其親。

文定集卷二十四

五言古詩

題鄭氏鑑金堂

子雲抱遺經。寂寞飢欲死。誰家千金郎。車馬塞閭里。如何今世人。持此欲勝彼。要知聖賢心。不爲取青紫。冷暖自所知。吾言聊爾爾。

題法海院龍溪亭

微茫雲兩角。屈曲路一綫。未容快先睹。已歎行百轉。流溪何從來。神物昔嘗玩。興梁儼堅牢。亭宇復明綯。豈惟濟病涉。更可供息宴。信哉善知識。作此巧方便。茂樾兩交蓋。清風四揮扇。祇恐境中人。卻有桑下戀。臺山不須問。此去直如箭。何妨酌靈水。一洗眼花眩。舉頭未及眸。已知梵王殿。

和遊南巖

南峯不藏善。逢人說南巖。南巖亦何好。造化祕此緘。煙雲印全提。松竹色半酣。去郭十里巖。守戒僧二三。乞身滿一日。幽事亦可探。行客問征途。居者索轡銜。蕭條野店煙。龔靜彌勒龕。念非塵外侶。不分禪味甘。受傭作閒人。自縛亦何慚。于時日在房。山色染蔚藍。一徑盤鬱青。羣峯列空嵌。冷泉計涓滴。淪鼎消塵凡。端如常德靜。可警疾步貪。聯鑣出雲門。回首憐煙嵐。公其吐妙語。勝事須指南。

借舍人呂丈送大雅東還詩韻奉呈

典刑寄老成。師友須淵源。今代紫薇公。身退道益尊。言行無表襮。卓然中所存。雲雨自翻覆。誰能動毫分。洗垢旣無垢。尙或求癥痕。嗟我與徐子。昔也掃公門。相期膏吾車。從公畢斯文。

暮春

閉門聽風雨。不知門外春。茲辰聊散步。霽色如相親。日月不與吾。花柳隨時新。悠悠竟何事。悚然懷故人。家叔泚次暮春韻呈知止祕校

一日復一日。山間已暮春。人事有忙迫。景物無疎親。誰知一雨後。滿目皆懷新。風光欠管領。付與得閒人。再用前韻

駕言寫我憂。一覽無邊春。先生方閉戶。不可得而親。寧逐兒女戲。要觀物化新。不見舞雩下。冠者五六人。復次數語呈知止

斯道有張弛。如天有冬春。雍容貴可久。促迫終難親。槁枿久乃腐。流水汲邇新。雖云不窺圃。乘馬復何人。
〔原註〕乘馬。亦用董生事。

七言古詩

尤美軒

巉然絕壑臨招提。仰視疑欲干晴霓。林巒獻狀還左右。煙雲變相隨高低。少日登高不憚遠。喘汗頰顏如夏畦。卻憑軒檻認行處。一覽不待窮攀躋。愛山願作此軒客。飢火驅出仍東西。青衫烏帽犯塵土。夢想春綠浮鳬鷺。歸尋舟刻劍已往。扁榜僅能存舊題。道人知我若有失。更附山房拂棋梯。方欣勝觀還昔時。忽訝妙語來磻溪。茫茫六合有安宅。恍悟十年行路迷。甘與山僧爲逆旅。自使婦姑相勃谿。暗明通壅悉還汝。無所還者吾其棲。但慚屋上復加屋。空費囊中金裹歸。

五言律詩

送刪定聞人丈歸嘉禾

漫作中都士。柴門每自扃。遺經究終始。奇字講聲形。前輩今無幾。微言世莫聽。扁舟轉河曲。已見故山青。

題表上卷舒軒

高軒聊自娛。俯仰稱幽居。世道有興廢。人心隨卷舒。圓機應有此。膠柱合何如。愧匪許詢輩。時來問滿虛。

陶山書院

陶山讀書處。景物自天成。幽澗菁莪盛。高岡彩鳳鳴。雨餘山色秀。雲淨月華明。靜聽寒泉響。潺潺洙泗聲。

輓侍讀龍圖學士周公

四海聲名久。中朝德齒優。金華方入侍。琳館遽歸休。全福人皆仰。孤風世莫留。老成零落盡。不獨爲吾州。

輓參政王公

轍迹環吳蜀。艱難嘆委蛇。秉鈞纔數月。去國竟終身。文武才猷遠。經綸事業新。襄陽耆舊傳。寧復有斯人。

輓學士張公

俎豆平生事。逢時卻論兵。帳中多妙畫。闔外卽長城。曾未登三府。何言夢兩楹。空餘行樂處。畫像儼如生。

輓詹事陳公

給諫皆言責。論思本從臣。獨公眞舉職。臨事肯謀身。再起名尤重。全歸跡已陳。空嗟古遺直。無復見斯人。

輓呂舍人二首

連蹇成遺老。纔聞直禁林。是非終不屈。進退了無心。萬事邯鄲夢。千秋正始音。心知公不朽。竇涕自難禁。接物初無間。微言獨得聞。相期深造道。不爲細論文。自有高山仰。誰知半路分。新阡疑可望。目斷只愁雲。

輓宣撫吳郡王二首

節義家傳久。艱難始見忠。一心惟徇國。百戰竟平戎。環列周廬肅。官儀道路同。細看麟閣上。誰得似初終。太傅元功首。汾陽異姓王。恩榮兼二美。聲跡遠相望。名載風雲會。神遊水月鄉。維師空贈典。無復見鷹揚。

七言律詩

雪中梅花

風弄蘆簾掩復開。閉門一室此徘徊。故人難望扁舟至。遠信誰憑驛使回。窗外不知飛霰集。坐中只覺暗香來。新詩亟報春消息。不待天邊看斗魁。

與談命鄭柯山

柯山落魄一仙翁。二十八宿羅胸中。學術該通明若鑑。襟期豁達氣如虹。醺醺痛飲一樓月。落落高談千古風。一本流年無惜示。貯之他日驗窮通。

陳經略生朝四首

喜詠高秋此日生。門閭佳氣想充盈。堂堂體貌千鈞重。凜凜精神一座傾。暫使遠民瞻玉帳。要知聖主有金城。兜牟卻作貂蟬去。五筦難淹宋廣平。

〔原註〕今五筦皆隸廣右。

嬌姓從來莫與京。傳家初不爲金藏。只今八桂蒼蒼處。倍覺中台兩兩明。南徼不聞刁斗擊。北轅行見衮衣迎。定知天錫公難老。端與邦家立太平。俛視人寰但一漚。應緣來作聖時遊。英風蓋世桂林伯。相業傳家戶牖侯。號召卽看持玉節。姓名已久覆金甌。他時欲記中書放。簡策應須汗馬牛。欲知今歲好生朝。召節翩翩下九霄。便入三槐新位次。空餘八桂舊歌謠。機神照物宜前列。質幹參天合後凋。他日凌煙圖畫處。方瞳炯炯映金貂。

送陳經略二首

英姿卓犖衆長兼。暫假威名鎮嶠南。忽報郵音馳尺一。卽看躔次近魁三。照人風采誰居右。致主功名在

立談遠俗豈知如許事。只言無計駐征驂。
清明公正復慈祥。觸眼平生見未嘗。自幸來依驥騎幕。如何又趣舍人裝。雲霄去路日千里。萍梗微蹤天一方。獨有此心無遠近。歲寒猶欲試冰霜。

分韻送胡丈歸建康

先生高臥武夷巔。一旦趨朝豈偶然。報國自期如皦日。歸田曾不待來年。懷鉛共嘆揚雄老。鞭馬今輸祖述先。冊府風流久寥落。送行始復有詩篇。

偶見文子失舉後詩次韻以廣其志

落落開談四座驚。已應俊氣壓諸生。高山意遠難知己。白雪詞高絕和聲。此道要須齊得喪。古人初不爲功名。芬芳各自隨時耳。何用臨風嗅決明。

鹿鳴宴席上詩二首奉送解元諸先輩

從來人物數成都。果見英髦入薦書。齊魯風流方演迤。淵雲文采自紆餘。姓名卽上飛龍榜。鄉里爭迎駟馬車。聖世取才三尺在。但慚無地更吹噓。

嘉賓式燕正炎曦。風自南來爲解圍。細聽吹笙仍鼓瑟。卽看結綬卻登畿。清朝不用齋刀布。晝日偏宜著

錦衣。太守自憐推不去。棧羊醞酒待還歸。

〔原註〕刀布還歸皆文翁傳事。

故事鹿鳴宴賦詩。所以致勸駕之意。如蒙繼和。不必次韻。或五言。或七言。或一首。或二首。各從其便。庶幾得以觀志也。幸察。應辰上聞。

五言絕句

宜春漫述

本是扶犁客。隨緣漫作官。故山應念我。薇蕨已闌干。

歸雲堂

浮雲本無心。人心逐雲去。更作歸雲堂。雲歸竟何處。

送沖公謁六祖道場

直指嶺頭路。寧論幾日回。尋春有消息。寄我一枝梅。

七言絕句

宜春士愿樸而虛蒙珥筆之名。每欲爲邦人一洗之。偶筆工傅氏求詩作此。

只今頭上半儒冠。誰肯公庭弄舌端。試問毛錐將底用。奪標他日萬人看。

〔原註〕奪標。乃宜春先賢故事。

與酒家沈生

有客堂堂空兩手。無人爲借太阿來。與君上挾浮雲破。放出陽光萬丈開。

送王獻可歸信州

月旦千今合改評。一官謀食百無能。君歸錦里人應問。好箇藍田崔縣丞。
次漢英教授示和尹少稷韻四首

五車拄腹成何事。空受才名二十年。一壑生涯長齟齬。邇來行李已三遷。
淵明心遠自無塵。豈必生涯與水濱。雲氣日佳飛鳥樂。寥寥此意付何人。
疇昔持心欲見賢。肯容閭巷快爭先。豈知呎尺隔千里。空誦白雲長在天。

〔原註〕白雲長在天。呂公遺少稷詩。

頻宮夫子日扃門。厭聽兒曹說怨恩。猶念貧交無與樂。時流妙語到荒村。

池荷

香分淨社色專城。冠蓋如雲照乘明。曉露浥妝秋豔曳。涼風吹月夜經營。

琵琶洲

塞外風煙能記否。天涯落日自心知。眼中景物參差是。只欠江州司馬詩。

巖初生

一拳打破地皮穿。擎住春風不放拳。直待子規啼夜月。放開青掌始朝天。

牽牛花

葉細枝柔。獨立難。誰人擡起傍闌干。一朝引上簷楹去。不許時人眼下看。

送陳德潤赴惠州

山行五日到崇安。欲往從之尙阻艱。聞說惠州天樣遠。幾時音問落人間。

宜春書事

飢寒驅出故山來。俗事如麻撥不開。問我此行何所得。未嘗識面有澹臺。
〔原註〕謂澹臺滅明。

題常山孔塢碧照閣

門前塵土暗衣冠。池館無多意已寬。試問主人閒適味。冰簟正自不知寒。

帖子詞

端午帖子詞皇帝閣

聖德臨尊極。民心戴至仁。喜逢重午節。共祝萬年春。
雨暘皆應節。和氣滿平疇。欲識天顏喜。農家麥有秋。
永日雖祥鬱。風生殿閣涼。聖心非獨樂。均施徧多方。
躬行盛德基。王化密贊成。謀授帝圖福。及萬方天所相。祛邪何假佩。靈符。
王業艱難素所知。歲單喜見獻新絲。盤中更進長生縷。卻記親蠶繭館時。

萬年珍木綠陰成。殿閣微涼次第生。簡靜初非拘月令。懷冲履正自心清。

太上皇帝閣端午帖子詞

道大光今古。功成付聖明。超然羣物表。但見四時行。
漏轉銅壺永。風來玉殿清。天申佳節近。比屋盡歡聲。
外物雖無累。誠心每在民。薰風能解慍。亦足助堯仁。

金碧叢中翠艾垂。正當午日一朝時。君王自進長生縷。細剪菖蒲泛玉卮。
絃歌密意寄南風。豈易形容長養功。地厚天高何以報。祝堯惟有壽無窮。
飛來峯下水泉清。臺沼經營不日成。勝境自超塵世外。何須方士覓蓬瀛。

火德方居夏。端符帝運亨。化工初不宰。繼照付重明。
和樂天中節。雍容物外身。羣生蒙長養。誰復識堯仁。
水殿風來細。槐庭日度遲。聖心無外累。動息自隨時。

聖治從來本好生。擬銷劍戟助農耕。此心自與天無間。豈待丹繪始辟兵。
年年時節近天申。喜氣歡聲逐日新。請祝聖人如一口。定知德壽萬年春。
冷泉堂上湖山勝。聚景園中草木芳。萬物欣欣供燕樂。自然祥暑變清涼。

太上皇后閣端午帖子詞

周室興王業。堯圖授聖人。誰知皆內助。功德古無倫。
仁心均動植。風化正邦家。福慶方駢集。靈符尙辟邪。
心境俱清淨。能令五月涼。芬香隨處有。不待沐蘭湯。
坤元厚德孰能名。履正懷冲本至誠。自是從容常中道。非因欲待晏陰成。
俯視紛華等粃糠。隨時邀樂任嬾嬾。宮中鬪草知多少。自有金芝冠衆芳。
自然長壽又康寧。德合無疆萬物亨。聖主愛親思盡美。更羞仙朮助延生。
中興雖帝業。內治本陰功。天下供榮養。方知福報崇。
乾坤皆數五。日月正符同。但仰重離照。難名厚載功。
寶殿名康壽。皇心在祝延。願從重五日。更閱萬千年。
陽居大夏方行令。已有微陰次第生。細察天時知物理。常將儆戒保和平。

上古遺書究治終。長編通鑑更參同。端居坐照無窮事。何用江心百鍊銅。

〔原註〕還德殿記載上語云日讀尙書通鑑。

晉國燔山求介子。荆人角黍祀靈均。聖君念舊仍從諫。千古忠賢氣亦伸。

文定集拾遺

賀郡王冠禮表

吉日載涓。緝儀備舉。慶由禁掖。歡浹寰區。中賀臣聞。聖王察於人倫。蓋將敷教。男子重於冠禮。所以正身。弁有三加。賓存一獻。彌貴成人之道。適當就傅之年。矧是皇家。恢疏王爵。天臨祕殿。俯觀展弁之容。星拱大庭。咸覩義冠之美。粲然嘉事。屬此盛時。茲蓋伏遇皇帝陛下。樂育羣材。儀刑萬國。丕合多男之祝。益開同姓之封。用壯本支。率循法度。俾其謹始。庸示有終。臣未造外朝。側聞茂典。安榮相若。慶抃攸終。

播芳大全
集卷一

謝轉官表

伏覩勅命。以臣知池州日。守禦有勞。特轉一官。尋具狀辭免。蒙降詔不允者。承流遵職。恩寬罪戾之餘。糾衆詰姦。責在封疆之守。徒知竭盡。敢覬褒嘉。顧遜避之莫從。但兢慚而失措。臣中謝伏念。臣奮身寒苦。遭世休明。推遷浸歷于華塗。放逐尙分于小壘。不虞羣盜。孰擾隣州。終勤虎旅之來。坐致湯池之固。因人成事。碌碌無橫草之功。忘戰必危。赴赴有干城之武。逮茲懋賞。輒復露章。仰斬曠蕩之恩。均及偏裨之士。詔音開允。輿論豔歆。退自省循。實爲僥倖。茲蓋伏遇皇帝陛下。示天下以大信。得民心以至仁。寇攘宜誅。盡掃萑蒲之聚。膏澤所及。弗遺蕭艾之微。矧是孤蹤。夙塵從列。旣佩循環之寵。仍叨進秩之榮。視若介鱗。猶

能思于報效。加之鞭策。期必徇于糜捐。

播芳大全
集卷六

賀左丞相啓

伏審播告大庭。晉登上宰。峻班儀於左棘。首揆路於中臺。四夷聳聞。九鼎增重。伏惟某官。賢推名世。道富經邦。嶽降神而生申。實維周翰。帝賚弼而得說。用作商霖。變故屢更。精忠彌著。掃除內亂。高五龍夾日之勳。攘卻外虞。成一馬渡江之業。方輔寧於法駕。將經略於神州。貝錦遽興。扁舟輕去。屬分江而不帥。乃銖鉞以臨戎。羽扇綸巾。已坐清於妖祲。命珪相印。蓋懌賞於元功。矧獨兼文武之資。宜並注安危之意。逮聞虛位。果趣賜環。非衣之謗何傷。有袞之思咸屬。顧乃心王室。喜魁柄之重歸。而戮力中原。佇皇家之再造。天時有待。物理攸同。某滯迹一涯。神馳數仞。聆制麻而相慶。曾無瘴海之殊。引賓履以交趨。獨歎翹材之阻。其如瞻頌。莫盡名言。

播芳大全
集卷八

賀中書林侍郎啓

顯被制書。進參機務。輟詞臣於鼇禁。訂國論於鳳池。縉紳聳聞。中外交慶。恭惟中書侍郎。懿文華國。直道致君。以淵雲之學。自名一家。以晁董之才。親承大問。始終全節。被遇累朝。踐揚皆極。於華塗。圖任委歸於黼屨。司北門之獻納。總右省之幾微。深惟不世之姿。洞達當時之務。靡勞施設。足見猷爲。方將沐浴於太

和何以揄揚於盛德。永垂方冊。屬我宗工。某一走門牆。六更符印。忽驚流落。獲在陶鎔。倘蒙芘於衰殘。尚

少圖於奮厲。其爲抃悃。萬倍常情。

播芳大全
集卷十

賀朱丞相帥紹興啓

伏審輟從經幄。就領帥藩。還祕殿之降名。建行朝之巨屏。逖聞新命。同極歡心。恭惟某官。德茂儒宗。才優王佐。高明淵懿之學。素博極於羣書。疎通雄傑之文。獨兼全於素器。名喧宇宙。會感風雲。徧揚簪橐之華。亟拜鈞衡之重。遭時多故。能人所難。夷狄長驅。而笑談救寧。當匹馬渡江之日。兇渠作逆。而從容處決。成五龍夾日之功。忠嘉昭宣。識量宏廓。久淹留於湖海。實注想於宸旒。衰衣繡裳。方趣還於北闕。朱幡阜蓋。聊借重於東郊。諒亦假途。卽還揆路。某受知頃歲。阻闊有年。早荷鈞陶。采及葑菲之下。比交印綬。實慚糠粃之前。承教匪遙。向風竊抃。方炎曦之在候。屬旌旗之戒塗。跋履之間。節宣是禱。

播芳大全
集卷十六

謹案宋汪應辰文定集。宋史藝文志。暨本傳皆未載。明宏治間。程敏政於文淵閣得五十卷本。刪存二十卷。嘉靖中刊行。嗣後祇選本流傳。原本遂佚。此卷從永樂大典采出。共二十四卷。

卷首提要。稱是
集載宋志。殆偶

誤也。宋志祇有汪應
辰翰林詞章五卷。

歸安陸存齋觀察心源。是集跋。據五百家播芳大全集。又得遺文六首。臚列篇目。

見儀顧堂集。今檢原書具錄全文。輯爲拾遺附後。光緒二十一年孟冬十月。大興傅以禮、節子、識。

